

天

史

管見序

人日在天中。天不可得而見也。穹窿以上。六合以外。聖人有不知焉。而執管以窺之。小則小矣。不可謂非天也。天無大小。見者卽是。如一勺水。具大海味。安得謂天非管中之一物。而獨曰管爲天之一物乎。昔鄒衍善談天。吹管則律回寒谷。豈其別有奇

術與抑亦通乎葭灰之氣而善導之也。如以管則大明小明一也。曷可令坐井者笑人乎。故謬以俚言附之曰管見。

天史卷之十一

青都任 濬文水甫評

東武丁耀亢野鶴甫著

○管見

○天帝

談天子曰、今之覆於上者何物耶、冥冥然、蒼蒼然、赫赫然、遠而不可際也、高而不可階也、廣大而不可度、埒也、先儒曰、玄穹之上、有帝主之、其爲說也久矣、豈果有垂旒戴藻、南面而臨、如王者之容、以稱爲帝者

耶。豈果有重樓巨闕。金門玉戶。如帝者之居耶。將結
構於何所耶。抑果有垂紳正笏。帝者之寮。乘一如兵
農。錢穀禮樂刑賞。而各司所職耶。其氣結耶。抑形著
耶。亦有聲色飲食衣服財幣之用。借物而生耶。豈遂
虛游玄杳。蟬蛻羽化者耶。其悠久高明。一人而長住
耶。抑殿最推遷。而互爲主者耶。將帝之上。更有帝以
統之耶。幻矣哉。執理者不徵以形。則民無以信其目。
論氣者不叩以聲。則民無以信其耳。君請指其形。叩
其聲。以仰問乎穹窿之宮。管窺子曰。今吾與人言人。

已無徵不信矣。又何敢以言天。吾亦與之言人而已。
矣。盤古以上無論已。五帝之盛。民僕而問。物衆而虞。
人之氣與天相迤。帝但以其權付之羲軒巢燧堯舜。
諸君之手。高拱乎穆清而已。下視吾民。熙熙皞皞如
魚在大壑中。生歟夭折。而無碍於治。故堯曰咨爾舜。
天之曆數在爾躬。舜亦以命禹。湯曰予小子履。敢昭
告於皇皇后帝。帝臣不蔽。簡在帝心。其視天帝真如
堂下之人。承堂上之命。歟。其後明王雖興。焚鄭燔骨。
而帝不肯降。以人之氣漸繁。物之殺漸勝。天遂與人

相遠。高居太清。默考其成。故外寬而內嚴。始疎而終密。懸其法於耳目之表。列其網於空虛之上。巧者拙之。黠者愚之。捷者蹶之。鈍者援之。如一粧孽粧癡之家翁。視奴婢子女。賢愚狡僕。歷歷在其眼中。倘少竊盤餐。竈菽。輒鞭朴隨之。日亦不足矣。至於狡奴悍監盜大物。而蔑家法。則撲殺之不旋踵。蓋有所糊塗然後有所精察也。故爲之日月以鑑之。風雨以滋之。雷電以威之。霜雪以培之。星辰以界之。爲之紀其功過。察其忠詐。著其灾祥。垂其子嗣。晝行居其首。夜臥入

其聲如環之循。往復而無端也。如軌之轍。遠近而一
跡也。故曰天鑒在茲。蓋無人無時。而不在帝照臨中
矣。客曰。夫一身而念分善惡。一室而人殊情性。合四
海八荒。長幼稚壯。嘔嘔啞啞。茸茸沓沓。蓋不可以毛
髮數矣。况夫室家瑣細之謀。物類幽昧之事。帝亦能
人人入其家。以毛索乎。亦如世俗所謂驅神物爲之
搜核。而屑屑記之乎。吾業儒者也。執於理數而已。天
帝之說。先王神道設教。明民愚民焉耳。子亦何執焉。
管窺子曰。客亦知夫暗室乎。盲者與明者俱不辨也。

主人持三寸之炬。則忽然開明。室之中大而床几。瓮
盎。小而鬚眉爪髮。妍者。媿者。橫者。直者。皆在照中。而
炬無煩照也。至於照長者得影長。照短者得影短。各
自得之。貞淫傾覆。一如是觀。今夫六合一巨室也。貴
賤大小。一室中人也。天帝一主人翁也。禍福之權亦
持其炬者而已矣。故日星歲時。帝之方伯連帥也。五
祀羣神。帝之庶司百職也。一歲以報政。三歲以考功。
帝之黜陟賞罰也。帝曰。昔吾於人也。聽治以人。今吾
於人也。代治以祿。有善焉。卿大夫曰。福之。帝曰。不可。

子觀厥終。卒善焉。然後福之。有惡焉。卿大夫曰殺之。
帝曰不可。子觀厥悔。卒惡焉。然後殺之。有同報而異
時都。稷契之子孫。皆得有天下。是也。有殊代而一律
者。周宋之子孫。同一失天下。是也。至如恩仇報復。生
死往來。急速緩遲。巧逢善湊。其載之書冊。傳之耳目
者。班班也。孟子曰。天不言。以行與事示之而已矣。是
故聖帝明王。升中卜吉。牽牲埋玉而求。匹夫窮苦叩
額無門。則呼天以自急。何也。人人知有帝也。董子曰。
爲治者當求端於天。言天者必有徵於人。是漢於言。

天者矣。

○天理

天理者萬物之總名也。萬物之原出於天。天具而理生焉。理之爲理。即天之所以爲天也。人之所以爲人也。吾畢此二語而已矣。今日天之爲天。有日月雲雷風雨電霧種種不齊之氣候。莫不有理。以主之曰元氣是也。而人不信也。以爲誕而已矣。曰人之爲人。有耳目鼻口筋骸骨節種種不齊之孔竅。莫不有理。以主之曰良心是也。而人不信也。以爲迂而已矣。不以爲誕爲迂也。則以爲聖賢強立此名色。假合理道以

教人者也。嗚呼。天可見而人不見之人。可自見而又
不見之。然則此理。經幾聖。幾賢。千言萬語。翻騰之而
猶然狂侮不信也。則不如與之言俗人之言而已矣。
聞嘗聞諸俗人之言曰。某某有天理者也。究其所言
而按之。是即天之所福祿名壽。而昌大其子孫者也。
後果然曰。某某無天理者也。究其所言而按之。是即
天之所危亡賤辱。而殘滅其子孫者也。後果然。羣而
詠之。羣而唾之。清議之所不出。士大夫未嘗過而問
焉。而聲聞於天。然則俗人。都天人也。俗人之言。代天

之言也。天理之所從出也。睡夢中有不滅之良心。痴
蠢中有見天之實話。憊勝夫知天理而以爲迂爲誕。
爲聖賢假合取功名之虛具者也。然則天理者。因乎
人情。統乎天倫。喜怒哀懼愛惡欲。七者弗學而能。君
臣父子昆弟夫婦朋友。五者弗勉而知。分而爲性。教
之衆矣。而一聽乎自然之人事。何者。赤子而知孺慕。
非教養也。出其情之所不容已。如是而充之。長而猶
是也。老而猶是也。大舜終身慕不過一全。天理之赤
子耳。若夫其境則有變焉矣。孝衰於妻子。忠奪於身

家手足殘於家產。久要敗於利害。糟糠薄於多寵。非天理至此。滅絕也。譬如源出崑崙。而散爲黃河之九曲。其間山谷之所洄洑。漪瀾之所旋射。與夫糞穢沙礫之所淤積。而又有蛟螭蜃蚌。鱗鱗之所呼吸。縱橫騰沸。其間遂不覺東西逆。而懷襄倒流也。勢不得不日趨其下。至於風靜浪平。水落石出。呂梁灕源。牛馬幾時終有。百谷歸王之一日。則其不絕於天也。亦可知矣。知天理之自然。而萬善之名可以不設矣。雖然。見金而思攫。見少艾而思摟。見高官厚祿而思竊。亦

自然也。獨非理乎。曰。此欲也。非理也。人也。非天也。帝王未嘗以饑寒待名節。天地未嘗以鰥寡禔夫婦。聖賢未嘗以干祿病學問。得之正者則爲理。得之邪者則爲欲。理之所收。得在我者也。欲之所求。得在人者也。得在人則可以殺人。可以奪人。可以謀害殘賊人。無不爲矣。是即俗人之所謂無天理者也。而天亦不理之矣。得在我則爲聖人。爲仁人。爲方便教育慈悲之人。亦無不爲矣。俗人之所謂有天理者也。而天亦理之矣。蓋其大而無所不包。小則一絲之不容紊。粗而

庸頑飲食之常精而聖賢踐盡之不可罄理者條理精詳之詞也。而天則清明之極至者也。清明而精詳故千里萬里猶是也。眉睫猶是也。千聖百王猶是也。童蒙猶是也。穿窬昏夜攫奪明目見人而學揖讓指之爲盜則面赤而赧焉者天也。途人戟手而爭傍觀者一言以相釋輒拳拳而服焉者天也。蓋心動則天見天見則理生如大海水百川咸受至於潮汐之大不能容已。成之魚鱉如人目光高下畢收不能容纖翳微塵必摩蕩之而此何也。非其所固有也。非固有

之物不驅除之亦不快活者也。幾見古來大奸大惡。當其殺人幽詭之處。黯黯淡黑。終亦有肺肝自揭之一。非人揭之。彼自揭之。以求其天理之復歸。如挑刺於肉中。撥塵於眼內也。嗚呼。然則無天理之事。非所樂爲也。有涕泣悔恨之時。而不以告人者也。是則天之所以爲天。人之所以爲人。如此而已矣。若夫精一危微仁義禮智之名。與夫堯舜禹湯文武周孔之君子。是今之所習聞。習見爲迂爲誕。而不欲再襲者也。吾亦與之言。俗人之言而已矣。

○氣

凡。數。皆。有。不。可。必。者。也。而。泥。於。天。乎。苟。有。可。必。遂。有。不。可。必。夫。不。可。必。者。非。出。乎。天。之。外。也。人。之。所。見。所。聞。有。窮。天。之。所。生。所。化。無。盡。以。有。窮。之。見。聞。而。欲。窮。無。盡。之。生。化。亦。猶。夫。隙。之。觀。圖。井。之。窺。天。而。欲。不。眩。焉。得。乎。夫。所。爲。福。善。禍。淫。者。非。以。福。之。可。必。邀。禍。之。不。必。降。也。斷。斷。而。求。之。斷。斷。而。責。之。君。子。亦。有。不。享。報。之。時。小。人。亦。有。苟。免。之。日。矣。則。天。下。之。可。必。者。常。火。而。不。可。必。者。常。多。天。亦。有。時。而。窮。天。之。所。窮。聖。人。

不可得而知也。爲其可必者存其不可必者。而天之所。所以致乎此者。夫亦可得而窮之矣。何也。先天之理。吾不可以更僕說也。而況爲前人之所言。蓋有絕理道之成說。而可以統攝之者。則先儒氣之之論也。氣也者。至誠之別名也。其爲體也不二。其爲用也多變。邵子曰。天依乎地。地附乎天。天地依附。合乎自然。自然者。非有所量於其間也。剝復相生。治亂相息。知終知至。天之變盡矣。今夫就其可見者而論之。春溫而夏燠。秋涼而冬寒。百族之所以蒸煦。萬類之所以老。

此氣之可必者也。就其不可見者而論之。陽春而有穀物之水。陰崖而有不死之草木。聖主而有水旱之灾。亡國而有魚龍之瑞。此氣之不可必者也。至於不可必而必之。吾仍歸之陰陽之二氣焉耳。有陰有陽者。先天之氣也。陰而陽。陽而陰者。後天之氣也。於是分乎人者。萬有不齊之氣出焉。而君子之氣。有時而衰。小人之氣。有時而盛。惑理氣之相窮者。遂各夫天之不可開也。不知此氣之妙於乘除。而人未之察取。夫日星者。天之精氣也。何以靈暄晦蝕。忽不自

保。豈日星妄受其罰哉。蓋善人君子。或爲乍蝕。乍晦。之日星。而羣小亦乘一時之雲霧。又何損於日星之明乎。或曰。子之爲感應之說。使人避凶而廸吉也。今舍理而憑氣。又何以明子之所是耶。曰。氣者理之所由生也。報應之所以出也。天有元氣。而害氣乘之地。有旺氣。而衰氣間之。人有生氣。而妖氣亂之。能通乎氣之故。而理在其中。天亦在其中矣。何謂元氣。細縕摩蕩。躋而能降。其氣清以寧。何謂旺氣。崇隆豐積。蔥鬱蒸蒸。其氣敦以厚。何謂生氣。忠信而愛人。勤儉而

其德聰明和平。其氣廉以貞。是故有道之天子出焉。
景星明。慶雲翔。醴泉出。朱草生。賢人在位。民壽且康。
豈非善氣之報哉。苟無其德。而天氣變於上。地氣變
於下。故雲漢昭回。而化爲板蕩。岐豐鎬洛。而遷爲蠻
夷。賢誅而佞寵。疾病而喪亡。又豈非惡氣之報哉。若
夫氣中之感應。可得而言矣。陽燧方諸。何取於水火。
草腐木爛。何意於螢菌。氣化之也。蟬脫於蜣。而清風
生。蝶成於蟲。而彩質出。鐘鳴而霜。礎潤而雨。氣動之
也。荆卿刺而虹貫。獄婦寃而霜飛。挽弓而沒石。揮戈

而反舍氣激之也。孟子曰：吾善養吾浩然之氣。陰符曰：禽之制在氣。蓋氣無豐嗇而分清濁，無吉凶而分厚薄。精凝而後氣滿，氣滿而後天降和氣，致祥乖氣致興，信不誣也。雖然，氣不可以速致也。旦而積之夜而養之，聽乎其所遇焉。夫焚檀薰膏，聞其氣可以達太清而致鸞鶴，然鸞鶴未必至也。若夫人有遺臭惡而揚腥穢者，雖山澤寥廓而蠅蚋螻蟻不呼自集焉。非獨天之報其惡者速於報善也。二氣之中，清氣少而濁氣多，一身之中，吉氣少而凶氣多，百年之中，治

氣少而亂氣多君子蓋取其可必者以養吾氣至於不可必者聽之天於是乎乃有可必者矣

○數

甚矣數之難言也。行乎自然之謂道。積於變化之謂氣。通乎屈伸之謂鬼神。至於數則有一定之局。聽其推遷而已矣。聽其推遷非聖人所樂言也。吾請得而申其說。夫數者始於太極。分於萬象。極之五德之周流。元會運世之終始。舉古今人物總在一大算盤中。任其歸除積散焉。耶。孟子曰。民之生也久矣。一治一亂。故三代聖人或遠者至七八百年。近者至四五百。年。至於五代則各數十年。而南北相殺者近二百年。

雖人事有不齊哉。何天道之相懸也。而其傷殘屠滅者。未可勝計矣。君子於此而論報應。不幾益測乎。雖然。蔑不有也。特人之所執者在旦夕。而數則在千百載之上。人之所見者在一人一事。而數則在通前通後之事。執其偏而求其全。信其所見而不信其所未見。又安怪其學之蒙乎。今夫寸握之物。累黍而較之。毫釐不爽也。積而至於尋丈之間。有差之指掌者矣。積而至於千萬之間。有差之什百者矣。非其數之不相若也。義和之步履。黠剽之審音。不能不依歲差之

度而聽移宮之律也。而況大數之無窮乎。夫數有小
大。有大周。何謂小周。日之數。一年而周天。月之數。一
月而周天。星之數。一夜而周天。何謂大周。一元統十
二會。一會統三十運。一運統十二世。亦猶一歲有十
二月。月有三十日。日有十二時也。今試歸而積之。一
元有十二會。則積三百六十運。四千三百二十世矣。
猶一歲十二月。積三百六十日。四千三百二十辰也。
前六會爲息。即一歲自子至巳之月。開物之數也。後
六會爲消。即一歲自午至亥。閉物之數也。故曰千歲

之日至。可坐而致。蓋以無常數而有常理。理有常則數亦有常矣。今夫人生於開物之數。則與時偕行。易曰。聖人作而萬物覩。生於閉物之數。則與物偕藏。易曰。天地閉。賢人隱。括囊無咎。無譽。當行之時而不行。如白晝而陷於大澤中。當藏而不藏。如淡夜而起。對寤而嘆。是二者皆謂之不祥。非時中之聖人。不免焉。是故有順數之君子。伊尹。周公是也。有逆數之君子。鵲逢。比干是也。有順數之小人。唐之盧杞。宋之秦檜是也。有逆數之小人。舜之四凶。周之二叔是也。同一

君子順其數則得福。逆其數則得禍矣。同一小人。逆其數則有報。順其數則無報矣。蓋天欲開千百年之新運。即有一二挽回之人。不難殺之以絕其故。非此一二人之惡也。天欲釀數十年之殺機。即有一二奸蠹之人。不難存之以代其驅。亦非此一二人之善也。舍其殺而爲其生。殺其衆人而生其一人。人之所不能。亦天之所不能也。何也。焚山而獵。竭澤而漁。豈魚鳥之罪哉。理窮於劫。雖上帝無以救水火中之昆蟲。君子無以救從井之赤子。待其氣候之自定而已矣。

是故就五德而測之。金數窮者其國主兵。其人好鬪。其天風寒。其物貴而錢賤。木數窮者其國多貴。其人盲狂。其天多暴。其物動而多徙。水數窮者其國內亂。其人多悍。其天多積。其物流而不返。火數窮者其國多災。其人多渴。其天多旱。其物多暴。土數窮者其國好。其人多。其天多晦。其物積而民勞。故同一天下也。忽草昧而文明。忽玉帛而干戈。當其分而合之。如轉丸。當其合而分之。如理絲。在聖賢不得。不克盡於人。事而天不能不生。夫治亂之人。亦猶夫。

衣敝則新之。器毀則鑄之。衣愈新而敝愈速。器愈鑄而毀愈多。聖賢不得不督課於裁鑄之工。拙而不能不聽其毀之敝之之運。若夫數之可知者。抑有焉。范蠡曰。天道不遠。十年一反。小凶則近。大凶則遠。是又數之近而可守者也。桀暴之朝。每有忠臣。頑嚚之庭。偏多孝子。然則不仁不慈之數在天。而能忠能孝之數在人。蓋聖人言道而不言數。道以盡乎人之事。數以乘乎天之運。存而不可以明民也。

○天命

自河洛天開而聖人出。聖人出而萬物定。天首以命。命羲軒堯舜。暨文王周公孔子。演而象之。天命愈章。而理愈隱。易之三百八十四爻。皆精於言命者也。書曰。顧諟天之明命。曰。惟命不于常。詩曰。維天之命。於穆不已。孔子曰。不知命。無以爲君子也。蓋幾於終身。終日言命矣。門人記之。曰。子罕言命。豈猶有遺蘊秘教。未易諄諄爲世俗道耶。抑幽遠玄晦。恐驚愚飾詐。不可以爲訓。耶。吾旣不能測先聖之所未言。又不敢

襲先聖之所已言。記曰。命以坊欲。無已。其就世之所
謂命者。反覆言之。亦惟使世之愚者。知命之在天。有
一定而不可干。越之數。使賢者。知命之在我。有當身
不可欠缺之理。如是而已矣。今俗之所謂命者。大抵
有三。其爲尋常之論者。曰。貴者飛天。賤者墜淵。富者
厭梁肉。貧者委溝壑。同質也。而有勞逸。同氣也。而有
豐嗇。此殆天之生人。有厚薄多寡之分量。如豆之不可
爲釜也。尺之不可爲丈也。瓦缶之不可爲黃鐘也。
短褐之不可爲章黼也。培塿之不可爲華岳也。河潦

之不可爲滄海也。生有其質。享隨其量。是也。雖然。是以天爲偏厚。偏薄之父母。而羣生爲分多分少之兒孫。又何怪遺夫婦之憾。而興奸雄之扼腕乎。說未既也。其爲理道之論者。曰。德足以升。處廷之聞。則朝瘳而暮攝。道足以符。商岩之瑞。則晝版而宵徵。故大德必受。說命致禎。此皆感應必然之理。如種苗之結爲華也。伏卵之化爲雛也。雲之騰爲雨也。泉之濬爲川也。薪之然爲火也。以神凝物。文采乃來。是也。雖然。是以天命爲必信。必果之死。履而道德爲取位。取名之。

捷。遲。然則仲尼伯益伊尹之不有天下而回曾閔孟
諸賢阨於困窮。又安怪起怨尤之嘆。而恨彼蒼之蒙
乎。說未既也。其爲曠達之論者曰。距不必不壽。顏不
必不夭。季不必不富。憲不必不貧。如樗蒲然。雉盧不
期其勝負也。如風絮然。雲泥不嘆其遭逢也。如浪萍
也。因時而樹木。種力同而中有榮枯。注水而畜魚。養
力同而中有生死。一家而忽有絕續。一事而各有得
失。造化小兒。顛倒無據。意者任運爲達天。無心爲聽

命乎是也。雖然是天以不聰不明之蠢塊而命爲難。
憑易失之幻。歟。又何以轉國家興廢之機。握賢聖脩
疑之鑒乎。說亦未旣也。是三者以現前爲命者淺也。
欲也。非命也。以脩凝爲命者局也。道也。非命也。以任
運爲命者幻也。化也。非命也。然而三者皆可以通於
命之說。至於命之理。則有所未盡。未盡而偏執之。則
必有執拗迂謬。固蔽齷曲。以附會其說。而不足以合
乎天時人事者矣。試因其說而克之。御路之馬。不必
有汗血之勞。絕塵之步也。隨朝而早歸。終其身肉肥。

而歿。夫獨非馬也乎哉。若夫驥困鹽車。汗蒸沍濕。困
僕隸之手。奔驛傳之檄。遂至脊穿力竭。而歿車側。伯
樂過而相其骨。曰。夫非驥也乎哉。千金買之。而已無
及矣。謂非命也歟。是以現前爲命者。夫亦有然者矣。
夫驥騶騷騶。不困於玉良造父之御。駑駘欵段。歷塊
焉而輟蹶。則驥之遇者其常。而不遇者其變也。故王
侯將相。或舉於魚塩海濱。牛耳羊皮之下。亦自不少。
則現前之命。亦豈盡然乎。力勤之農。手瘃背焦。汗糝
雨芸。終歲而無一刻之暇。亦云苦矣。秋成。則豐食。

而樂箒簞。亦得其所固有者耳。彼游惰者。田有與。家
家有懸耒。三時無一時之勤。至於卒歲凍餒而後。援
命以自解。曰夫獨非命也乎哉。則命豈獨限之歟。是
以脩凝爲命者。夫亦有然者矣。然而歷山之玄德。不
遇堯則終以有懷。負枵之元臣。不過殷則老於版築。
譬如良農。雖有耒耨之勞。而不能必天之無饑饉。而
賜也。以脩凝爲命者。又豈盡然乎。白首窮經。卒無一
綬之榮。羊頭封侯。而坐叨鐘鼎之奉。元愷不榮於桀。
紂。來廟不貴於唐虞。明鏡見弃於寫柱。飽魚蒙收於

逐臭無非以所生之遇合爲終身之得失是以任運爲命者夫亦有然者矣白晝攫金之賊罹於桎梏不曰我也曰命乎拔刃殺人之姦誅於刑辟不曰我也曰命乎怠窳偷時之士老歿而無聞不曰我也曰命乎色荒病慾之子癆瘵而殺身不曰我也曰命乎是故指蕉爲鹿認蝶爲周逐岐亡羊辨白非馬此滑稽者之說也若夫任運爲命又豈盡然乎吾知之矣意者今之推占生尅五行四柱爲命乎夫天下之大同時日生者不少長平坑卒何必皆犯三刑雲台諸燕

何必盡當六合。則五十一萬八千四百之極數。命豈
盡於是乎。蓋命也者。無然而無乎不然。知其所以然。
不知其所以不然。不知其所以不然。而知其不然。中
之所以然。其然者何。綱常倫紀中有命焉。求在我者
也。其不然者何。貧賤富貴中有命焉。求在天者也。天
不能生芝蘭而不生。枳棘夫胡爲使我生。不爲枳棘
而爲芝蘭也。天不能生騶虞而不生。虎豹夫胡爲使
我生。不爲虎豹而爲騶虞也。命也。芝蘭不以無人而
不香。騶虞不以非時而戕牧。故全命而全歸之。謂聖

人知命而終歸之謂賢人。委命而同歸之謂衆人。逆命而忘歸之謂小人。曰君子居易以俟命。莫非命也。順受其正。亦惟使賢者知在我之命。以盡其當然。愚者知在天之命。不求其必然者而已矣。

○鬼神

昔者春秋鄭人殺其大夫伯有，伯有爲祟，示夢於鄭人。明年果殺其害已者，子產立伯有之子崇，乃止。或問之曰：「鬼有所歸，乃不爲厲。吾爲之歸也。」魯成公八年，晉殺其大夫趙盾，趙括、晉侯夢大厲，化爲膏肓，病以死。歷觀前代譎怪荒誕之事，類然。豈鬼神之報應不爽乎？然亦有悠悠湮滅而無報者，何也？繫曰：「仰以觀於天文，俯以察於地理，故知幽明之故。原始要終，故知死生之說。精氣爲物，游魂爲變，故知鬼神之情。」

狀亦自明其理而已矣。夫上天下地。周流六虛。奇怪幽杳。不可勝窮。予何能殫數哉。季路問事鬼神。而子以事人盡之。問死。而子以知生盡之。中庸論鬼神之盛。體物不遺。而以至誠盡之。千古善言鬼神。固莫過孔子矣。昔子產視晉侯之疾。而不歸於閼伯實沉臺駘。允格而獨明之以美。盡坐疾而曰取精多則魂魄強。精爽至則神明生。所稱博物君子。殆不誣歟。後儒不明於此。而深嫉夫祝巫之荒唐。左道之邪僻。乃爲無鬼論以破之。夫使隱怪者無所憑以肆其惑可也。

而欲使天下之人知生而忘死。背神而信人。則郊祀之禮。先王亦何爲乎。吾以爲言無鬼神者。謬也。以鬼神之聰明。盡鬼神者。亦謬也。夫理大者。不可窮。以詞買生之席。何謂哉。試就人之生死言之。以爲生則爲人。死則爲鬼矣。夫人之一身。載神氣而生。當其朽腐歸土。亦如爪甲毛髮。蛻故就新。脩焉附氣而成形。以去。豈更有鬼在夫幽冥泉臺之下乎。如此則天地以來。當有無窮堆積不散之鬼。何所事事耶。即曰。日月星辰。絡南河。山。賁社。稷。咸主其命。夫星辰之落地。

每化爲土石。社稷之遷移。每憑乎草木。則是鬼神無
雲。而人貸之雲。又何鬼神之可拘哉。雖然。其說皆有
之。執而求之。則逝矣。夫狐突之見申生。漢武之見李
夫人。隋煬之見陳後主。武安之見灌夫者。神也。亦想
也。化彭生之豕。薦祖龍之璧。結老人之草。翻月下之
書。神也。亦兆也。子夏爲修文郎。韓擒虎爲閻羅天子。
李長吉修白玉樓神也。亦理也。故范金和土。執幣割
牲。先王飾爲宗廟之具。而洋洋在上。來格無射。則存
乎。其心。夫心者。鬼神往來之宅。幽明靈爽之地也。自

我作鬼。無見之。謂鬼。自我作神。無神之。謂神。當其一念之動。鬼神不我察也。幽室暗昧之事。隔垣之耳不聞。高明之職未燭。瞿然驚。怵然恐。忽而形諸著龜。動乎四體者。何物也。蓋邪者鬼之所由生也。正者神之所由明也。又何待於奄然腐化而後爲見鬼質神之目哉。故生而光明俊偉。無愧於天地。無玷於君親。得陽之氣居多焉。其生也分宇宙清淑之氣也。生而神者也。生而浸淫姦譎。如行魑魅。如走陷穽。得陰之氣居多焉。其生也載兩間汙濁之氣也。生而鬼者也。故

有神之氣者。神亦報之。祿位名壽。歿而不歿矣。有鬼之氣者。鬼亦報之。游魂邪氣。生而久歿矣。若必待鬼瞰其室。神處其宮。斤斤焉執吉凶之券。以相償。則鬼神之道不尊。故尼父以誠意爲大學之宗。而以鬼神滿至誠之化。然後範圍天地。彌綸萬物。而盡財成輔相之變。以合其吉凶。君子亦明其理而已。明其理而報應之說在其中矣。

○天鈇

王者立司寇。設五刑。明八辟。而聽之棘木之下。又有五聽。八議。三刺。三宥之法。所以代天行義也。清天下也。然而必待告訴。必牽文義。有成案。則文易舞。煩勘。覈則吏容私。故羅鉗詘網。匪濫則疎。而漏網吞舟。愈恣跳擲者多矣。吾以按之天。蓋恢恢乎大哉。王者之鈇。固借天鈇以行者也。鈇有陰陽。律無顯晦。王者之鈇。刑人躬。天帝之鈇。刑人心也。其昭昭於人世者。大抵鈇之律有十。而無形者不載焉。請得而略數之。維

賊剛狠、叛弑君親、恃血肉力、以逆亂天者、殺無赦。姦淫無道、邪辟色荒、麀行獸心、以汙辱天者、殺無赦。貪弱恃強、草菅倫類、絕滅殘割、以傷天者、殺無赦。陰謀巧射、鬼矢弩機、假手殺人、以賊天者、殺無赦。巧妬工譏、專權恣虐、解剖性命、以冤天者、殺無赦。泥沙金玉、窮欲侈美、竭民人之脂膏、奉其狼籍、以賤天者、殺無赦。據位恃尊、凌物蔑禮、處無可加之地、以滅天者、殺無赦。培克漁獵、困剝鰥寡、積腐財貨、久壅天產、以私天者、殺無赦。借佛道說、爲商賈行、邪神左道、以盜天。

有殺無赦。居高絕物。煽衆市名。違命而拗時。伐異而黨同。以傲天者。殺無赦。此皆陽不協乎人心。陰有犯乎鬼律。或流爲怨詛而不省。或散諸歌謠而不省。或徵諸災異而不省。或覘及蓍龜而不省。天不得已於是以鈇加之。然而用鈇之道。則有五焉。殺人之父。人亦殺其父。殺人之子。人亦殺其子。則有報冤於狹路。快反於出爾者矣。明鈇也將取固與待滿斯傾。則有極之以名位。淫之以聲色。一仆而後無餘者。隱鈇也。冤多而報不及。賁盈而禍不足。則有弃絕不問而咀

嚼於其子孫以屠滅其世業有遲之數十年而更慘
者矣長鈇也假之以夢囈自陳其陰私投之以天灾
忽奪其精魄祿絕而苟活當身而現報者短鈇也陰
謀者必蹶其機逞剛者忽絕其力匹夫有罪一日而
忽遇刑笞良善偶私清夜而忽驚怪病至於福過灾
生神驕謗起此皆細小不絕物之鈇也故鈇在眼前
有車裂自殉者矣有請君入弑者矣有虎臣之槌報
父仇者矣有白起之劍仰天服罪者矣鈇在身後有
鞭尸數百者矣有浮蟲出戶三月不葬者矣有斲棺

出尸正法者矣。有子孫夷滅殆盡者矣。其歷歷不可
具數。以此得之。以此失之。我以之快人。人以之快我。
春秋之中。弑君三十六。亡國五十二。及綱目所載千
百年之報應。如出一轍。皆未有逃此鉄者也。故日月
陰陽風雨雷電鉄之權也。君臣父子嫡庶長幼鉄之
經也。仁義禮智惇篤敬信鉄之常也。干戈戰鬪彗孛
縱橫鉄之變也。故執是鉄者。原倫紀之義。以權之。測
淺深之量。以別之。察小大之比。以成之。安遠近之衡
以報之。其鉄未施。若或縱之。其鉄已施。靡所遁之。疎

而不漏也。威而不猛也。高而善聽也。周而不忘也。赫
赫乎。冥冥乎。無形。無聲。是謂天鈇。

○ 輪行

造車者不知其所適也。爲之軾爲之輓爲之輻爲之
蓋而其所以循轍而不窮者。車之所載。總聽用於輪。
圓其轂疏其輞。夫然後齊楚梁晉孟門太行任其所
之而之焉。而之之所以不窮者。則往復迴環之數也。
一步之中。輪輪相周。一雋之內。輞輞相代。輪以輞爲
郵。輞以輪爲轆。其往來如電之不可紀也。其推遷如
環不可殫止也。故車有損而輪不可損。車載實而輪
馭虛也。輪可絕而輪之轍終不絕。輪載車而轍載輪。

也。夫報應之理亦如是乎。前車者後車之轍也。前人者後人之轍也。過去者未來之轍也。車之上有大小。有輕重。有美惡。輪不與之爭也。御者之事也。往者過來者。續尺而度之。寸而報之。器貨之盈虛。有時而輪之禪代。終無窮期也。車之下爲平陸。爲溝渠。爲九折。坂輪不爲之謀也。駕者之事也。邪者邪之。正者正之。步轉軌移。途窮轍返。路徑之夷險無端。而輪之巡復不動也。今釋氏言輪迴。所謂阿鼻黑山等獄。杳冥昏黑。似涉幻妄。而一真自如。法輪常轉者。與吾儒感應。

之理實相表裏。吾細按諸史。脈又班班也。而後知今古一大路也。天地一車也。忠佞善惡。死生恩怨。一車中人也。而傾覆栽培。凶祥休咎。一車之輪也。遲速遠近。生死推遷。輪之轉也。仙佛人物。禽獸胎卵。輪之變也。故日月周天。歲終而各反其始。輪之周始亦如是而已矣。若夫王者制刑。立狴犴以司獄。懷刑之君子。稟稟焉不敢入。易曰。大車以載。有攸往無咎。詩曰。無弃爾輶。負于爾輶。終踰絕險。曾是不意。其斯之謂與。

○因果

因者。因也。因其所有。以爲果也。然因有三。果亦有三。激湍之下。必爲溪潭。因其勢也。叢林鳥雀。不呼自集。因其情也。卵生穀。濕生魚。腐生菌。因其氣也。豆之生芽也。隔宿而長數寸。其量不能過。而亦不後時。是一時之果也。十圍之木。旦夕尺寸。不見其長。至於根力盤結。則一日而十尋。是數十年之果也。東海之椿。百年得種。千年結實。種者不食其力。而蔭其子孫。與天地久。是數十世之果也。蓋因有善惡。果有芳穢。其果

速者福小而福輕其果遲者殃餘而慶長孟氏云爲
高必因丘陵爲下必因川澤與釋氏言種瓜種豆之
說若合符節昔有人善夢者畫思宮室則夢樓臺思
美人則夢歌舞思飲食則夢珍錯思仇恨則夢刀劍
蓋因想成見因見成氣因氣成感因感成結因結成
形因形成境投一核於土中苗而葉葉而華華而果
發有遲速卒未有不發者也而沈人事乎君子曰惡
之來也已則取之善惡之報各因其類

○陰陽

爲惡者莫極於陰謀。爲善者莫極於陰陽。何也。穿窬之盜。攫金於昏夜。足躡鼻息。而人不知。陰莫陰於此矣。俄頃而發露於詞色。故陰謀秘計。亦能取効於一時。至於事終情現。不能欺三尺之兒。蓋惡念屬陰。終發機於陽。善念屬陽。常造根於陰。此九六相倚之數也。故好名掠美之夫。亦知動稱陰陽。纔有一善。則延頸舉首。若望彼蒼。即予以倍蓰之利者。甚至放生食素。創募施捨。自挂一善人之扁於眉尖。昏夜營算。毒

整更巧。天不惟莫加之福。而大禍且及。然後曰甚矣。善之不足爲也。嗚呼。是以善爲嫌者。取。蓋積惡雖有餘殃。天有時赦。無心之犯。積善雖有餘慶。天必不苟有意之求。書曰。陰騭下民。陰騭者。人不及知之地。不存望報之心。如天之膏澤萬物而無施伐也。郭橐駝之種樹。盡其力。全其養。先若弃之。使樹食其養而不知。若宋人之握苗。未有不槁者。今之爲善。而以爲無報者。皆握苗。苗槁而欲廢農者。也。道傍遺金。守而還之。不告姓名而去。是陰騭也。再有人焉。必檢遺金以

求善亦迂矣。人有救一虫魚鳥雀而卒受其福者是陰陽也。再有人焉必羅織虫魚鳥雀數十百千以放之亦愚矣。蓋有心之善謂之陽德。陽則有形。無心之善屬之陰陽。陰則無量。德有不能施者。或乏於財。詘於勢。此博施之猶病也。陰陽不資於財勢。而以上天好生之心通之。故自天子以至乞丐皆有能爲之事。自三尺童子以至期頤皆有及爲之時。自舜文以至黷跖皆有可轉之機。何也。行人之所不及。知曰陰代天之所不能爲曰陽。

○ 儆戒

父母之愛子也。始則撫摩之。教導之。及其頑情不肖。則夏楚臨之。至臨以夏楚。而頑情愈甚。復肆其凶悖。狂淫以與父母抗。則亦惟絕之而已矣。雖曰絕之。猶必伺其動靜。偵其隱微。稍有一念悔悟焉。未有不涕泣而復收之者也。書曰。皇天無親。惟德是輔。惟上帝不常。作善降之百祥。作不善降之百殃。詩云。皇皇上帝。臨下有赫。鑒觀四方。求民之莫。明言乎上天之與下民。如父之於子。諄諄焉。畀之以重器。全而命之。使

全而歸之也。記曰：仁人事天如事親，故篤生一人而命之曰天子，以統夫億兆之人。而命之曰有天下。天下者，無一人非天之血氣，毛裏呼吸貫通者也。故順之則怡然喜，四時和焉；星辰理焉；萬物育焉。逆之則拂然怒，星流雹擊，水逆山崩，物怪人妖，種種而現，其不祥此無他。天亦處於無可奈何之地，而假怒以警之。至怒之不已，且從而弃之，弃之於是乎不可收拾矣。然後開直言之路，下罪已之詔，天心去而不可復回矣。故明君良臣知天之不可不懼也。有撤樂減膳。

避位省過之脩。祥桑生而自枯。熒惑逆而退舍。止乎
乎一念一事之俄頃。而立應於九天玄漠之上。亦猶
父母之於子。怒則斥之。悔則憐之。未有不可回之親
心。未有不可轉之天意也。太甲曰。天作孽。猶可違。自
作孽。不可活。故士庶人之將覆其身。則有夢魘體驚
之戒。卿大夫之敗其家。則有鴟啼犬嗥。鬼泣狐嘯之
戒。天子之亡其國。則有天晦地震。火災水決之戒。蓋
童謡物變者。父母之傳告。指示我也。風雨雷電者。天
母之呵斥涕唾我也。華嶽傾。黃河溢者。父母之摧我

牆壁碎。我瓮盜也。日月亂行。星落如雨者。父母之自
毀其頭目毛髮以與我告絕者也。五行所志不一而
足。未有不應若響而符若節者。然亦有應者。有始不
應而終應者。有始終卒不應者。何也。鵬來而賈生不
死。鼠拜而周南不驚。聖朝不無日月之蝕。亡主常有
草木之瑞。亦在人。之轉移何如耳。故乾之九三曰。君
子終日乾乾。夕惕若厲。無咎。周頌曰。畏天之威。於時
保之。可不戒哉。可不戒哉。

○變化

日月生。陰靈起。混沌外。篡竊始。揖讓煩。干戈滋。刀劍
竭。鐘鼓鳴。冰雪極。春陽回。此天地之變。變化化也。枝
葉燦。根本披。饑寒盡。綺羅殫。兒女盈。疲癯至。宮闕高。
丘陵積。歌舞譟。吊詛隨。此時勢之變。變化化也。前日
卿。今日卿。前門虎。後門豕。弓旌出。鼎鑊歸。珠玉沉。糠
粃飛。此一人之變。變化化也。朝爲屠。暮爲佛。入爲主。
出爲奴。上忽下。後在木。東復西。馬逐兔。此一心之變。
變化化也。故有變化者。有不變不化者。有不變以變。

不化以化者。有變仍不變。化仍不化者。有始不變而終變。始不化而終化者。有終變而變不終。終化而化不終者。有變化。然後有推遷。有推遷。然後有升降。有升降。然後有治亂。有治亂。然後有是非。然後有功罪。有功罪。然後有禍福。有禍福。然後有報應。報應者。隨其所變化而變之。化之也。就一日之中。變化無端。爭輪迴於一瞬。幻升沉於萬感。乍滅乍明。恍忽成象。或爲日星。爲冰雹。爲明堂。爲井坎。爲菩薩心。爲鬼王面。爲枯心木。爲凍死蛇。爲清涼水。爲濁熱泥。爲

入室之芝蘭。爲當路之荆棘。無不隨心寫照。觸物現形。是故上帝。賜其光焰。鬼神錄其美惡。百魔試其貞邪。片刻由其煅煉。勿謂性不可變。斬長橋之巨蛟。周處亦化爲名儒。勿謂數不可變。渡一葦之浮蟻。宋郊乃延其福壽。蓋短者可變而之長。增者可變而之減。富貴壽夭。陰爲消長。種種不齊之報。應皆種種不齊之善惡變化之也。爲善者如築土基。可以培。亦可以覆。爲惡者如斲敝衣。可以垢。亦可以縈。築者斲者。人之變化。而若縈繫垢。則天因之爲變化也。語云。人喜

則斯陶陶斯舞舞斯猶猶斯惛惛斯戚戚斯嘆一身
之變化如斯豈天道獨無變化乎蓋庸愚聽變化於
天如浮漚散芥肉喘而骨蚩終歸腐滅聖人以我之
道而變化乎天故位育參贊甘露降景星出麒麟遊
鳳皇翔無爲而化不動而變爲變變化化之源蓋變
化者天地之活局鬼神之權術五行之生數三才之
妙用也故於天命理數之餘卒之以變化

集古詩序

夫史何爲乎言詩也。言乎詩之通於史者也。詩亡而後春秋作。三百篇固善言史。卦。坎。尼父丘明。正論之亂章。每證諸歌咏。蓋道有言。此以起彼者。要不外疏通善。象云爾。此詩之有益於史也。吾欲人之不忘於章也。故集歌銘。多欲人之

無負造物也。故集感遇。吾欲人之為善
恐不及。吾急於不盡也。故集惜時。吾欲人
之回頭顧影。轉眼成塵也。故集悲往。吾
欲人之忘物情。平世境。履險而如夷。處
窮而不隕。故集憂憤。吾欲人之萬派千流
遂源反本。故集知新。吾欲人之脫却糾
纏。終歸自在。雲破月來。水落石出。故終

之以樂天。夫古人之詩不必如是觀。以系之
史。因而觀詩。知我史。亦堪言詩。而詩固若
注史也。故作集古。

野鶴齋漫識

天史卷之十二

集古總目

一歌銘

二感遇

三惜時

四悲往

五幽憤

六知命

七樂天

集古歌銘一百

採薇歌

商銘

几銘

盥盤銘

楹銘

杖銘

帶銘

矛銘

劍銘

履銘

車銘

杖銘

衣銘

筆銘

金人銘

槃操

飯牛歌

越人祝

引聲歌

逸詩

井銘

座右銘

門銘

槃水銘

邁研銘

布衾銘

天史卷之十二

東武丁耀亢野鶴甫選評

集古歌銘一

采薇歌

伯夷叔齊

登彼西山兮。采其薇矣。以暴易暴兮。不知其非矣。神農虞夏。忽焉沒兮。我適安歸矣。吁嗟徂兮。命之衰矣。

商銘

無名氏

嗷嗷之德。不足就也。不可以矜。而祗取憂也。嗷嗷之食。不足狃也。不能爲膏。而祗離咎也。

几銘

周武王

皇皇惟敬。口口生垢。口戕口。

盥盤銘

與其溺於人也。寧溺於淵。溺於淵猶可游也。溺於人不可救也。

楹銘

母曰胡殘。其禍將然。母曰胡害。其禍將大。母曰胡傷。其禍將長。

杖銘

最乎危。於忿。竟惡乎失道。於嗜欲。惡乎相忘。於富貴。

帶銘

火滅脩容。慎戒必恭。恭則壽。

矛銘

造矛造矛。少閒弗忍。終身之羞。余一人所聞。以戒後世子孫。

劍銘

帶之以爲服。動必行德。行德則興。倍德則廢。

履銘

行必慮正。無懷僥倖。

車銘

自致者急。載人者緩。取欲無度。自致而反。

杖銘

輔人無苟。扶人無咎。

衣銘

桑蠶苦女工難。得新捐故。後必寒。

筆銘

毫毛茂茂。陷水可脫。陷文不活。

金人銘

孔子

古之慎言人也。戒之哉。無多言。多言多敗。無多事。多事多患。安樂必戒。無行所悔。勿謂何傷。其禍將長。勿謂何害。其禍將大。勿謂不聞。神將伺人。焞焞不滅。災若何。涓涓不壅。終爲江河。綿綿不絕。或成網羅。毫末不札。將尋斧柯。誠能慎之。福之根也。口是何傷。禍之門也。強梁者不得其死。好勝者必遇其敵。盜憎主。人民怨其上。君子知天下之不可上也。故下之。知衆人之不可上也。故後之。溫恭慎德。使人慕之。執雌持

下人莫踰之。人皆趨彼。我獨守此。人皆惑之。我獨不
徙。內藏我知。不示人技。我雖尊高。人莫我害。江海雖
左。長于百川。以其下也。天道無親。常與善人。戒之哉。
繁操

乾澤而魚蛟龍不遊。覆巢毀卵。鳳不翔留。憐予心悲。
還原息嘔。

飯牛歌

甯戚

南山矸白石爛。生不逢堯與舜禪。短布單衣適至骭。
從昏飯牛薄夜半。長夜漫漫何時旦。

越人祝

越文種

皇天祐助。前沈後揚。禍爲德根。憂爲福堂。威人者滅。
服從者昌。王離牽致。其後無殃。君臣生離。感動上皇。
衆夫悲哀。莫不感傷。臣請薄脯。酒行二觴。

引聲歌

莊周

天地之道。近在胷臆。呼噏精神。以養九德。渴不求飲。
饑不索食。處世守道。志潔如玉。卿相之位。難可直當。
巖巖之石。幽而清涼。枕塊寢處。樂在其央。寒涼四圍。
可以久長。

逸詩

雖有絲麻。無弃菅蒯。雖有姬姜。無弃蕉萃。凡百君子。莫不代匱。

井銘

李 尤

井之所向。寒泉冽清。法律取象。不繁自平。多取不損。少汲不盈。執憲若斯。何有邪傾。

座右銘

崔 群

無道人之短。無說己之長。施人慎無念。受施慎無忘。世譽不足慕。唯仁爲紀綱。隱心而後動。謗議庸何傷。

無使名過實。守愚聖所臧。在涅貴不緇。曖曖内含光。
柔弱生之徒。老氏誠剛彊。行行鄙夫志。悠悠故難量。
慎言節飲食。知足勝不祥。行之苟有恒。久久自芬芳。

門銘

盧仝

貪殘姦醜。狡佞訐懷。身之八殺。背惠恃已。狎不肖。妬
賢才。命之四孽。有是有此。余敢辭。無是無此。余之師。
一日不見。余心思其人。懼其人。其交其難。敢告于
門。

槃水銘

司馬光

繫水之盈止之則平平而後清清而後明勿使小歆小歆則傾傾不可收用毀其成嗚呼奉之可不兢兢

邁研銘

蘇軾

以此進道常若渴以此求進常若驚以此治財常思子以此書獄常思生

布衾銘

范純仁

藜藿之甘綈布之溫名教之樂德義之尊求之孔易享之常安錦繡之奢膏粱之珍權寵之盛利慾之繁苦難其得危辱旋臻舍難取易去危就安至思且知

士寧不然。顏樂簞瓢萬世師模紂居瓊臺。成爲獨夫。
君子以儉爲德。小人以侈喪軀。然則斯衮之陋其可
忽諸。

集古歌銘一終

集古感遇二

感遇詩

感遇詩

詠史

詠史

感舊詩

庭前甘菊花

逸民

南山有高樹

王昭君

架水藤

楊白花

林亭寓言

感遇

集古感遇目終

集古感遇二

感遇詩

陳子昂

吾觀龍變化。乃知至陽精。石林何冥密。幽洞無留行。
古之得仙道。信與元化并。玄感非象識。誰能測淪冥。
世人拘目見。酣酒笑丹經。崑崙有瑤樹。安得采其英。
賦而興也。君子以龍德變化也。

微月生西海。幽陽始化昇。圓光正東滿。陰魄已朝經。
太極生天地。三元更廢興。至精諒斯在。三五誰能甄。
賦也。感陰陽之消長。而求其端也。

蘭若生春夏。芊蔚何青青。幽獨空林色。朱紫冒紫莖。
遲遲白日晚。嫋嫋秋風生。歲華盡搖落。芳意竟何成。
比也。感時不再來。勉進修也。

溪居觀元化。怫然爭朵頤。羣動相啖食。利害紛疑疑。
便便夸毗子。榮耀更相持。務光讓天下。商賈競刀錐。
已矣行采芝。萬世同一時。

賦也。感萬物徇利而相爭也。

樂羊爲魏將。食子殉軍功。骨肉且相薄。他人安得忠。
吾聞中山相。乃屬放麇翁。孤獸猶不忍。況以奉君終。

賦也。感刻薄之非情。見推恩有本也。

市人矜巧智。於道若童蒙。傾奪相誇侈。不知身所終。
曷見玄冥子。觀世玉壺中。窈然遺天地。乘化入無窮。
賦也。感巧智無終。不及大道也。

呦呦南山鹿。罹罟以媒和。招搖青桂樹。幽蠹亦成科。
世情甘近習。榮耀紛如何。怨憎未相復。親愛生禍羅。
瑤臺傾巧笑。玉杯殞雙蛾。誰見孤城蘂。青青成斧柯。
興也。亦比也。感近習移人禍所生也。

積勞難得意。賞愛在須臾。莫以心如玉。采他明月珠。

昔稱天桃予。今爲春市徒。鴟鶚悲東國。麋鹿泣姑蘇。
誰見鴟夷子。扁舟去五湖。

賦也。感寵不足恃。欲知止也。

玄天幽且默。羣議曷咄咄。聖人教猶在。世運久陵遲。
一繩將何繫。憂醉不能持。去去行采芝。勿爲塵所欺。
賦也。感天道玄冥。下士不信也。

蜻蛉遊天地。與物本無患。飛飛未能止。黃雀來相干。
穰侯富秦寵。金石比交驩。出入咸陽裏。諸侯莫敢言。
寧知山東客。激怒秦王。解布衣取卿相。千載爲辛酸。

比也。感權勢被奪不可倚也。

翡翠巢南海。雄雌珠樹林。何知美人意。嬌愛比黃金。
殺身炎州裏。委羽玉堂陰。旖旎光首飾。葳蕤爛錦衾。
豈不在遐遠。虞羅忽見尋。多材信爲累。嘆息比珍禽。
比也。感才士自炫殺身也。

揭來豪游子。勢利禍之門。如何蘭膏歇。感激自生冤。
衆趨明所避。時弃道猶存。雲泉旣已失。羅網與誰論。
箕山有高節。湘水有清源。惟應白鷗鳥。可與洗心言。
賦也。感趨時之失勢。貴自返也。

仲尼探元化。幽鴻順陽和。大運自盈縮。春秋近來過。
商飈忽號怒。萬物相紛剿。冥海皆震蕩。孤鳳其如何。
賦也。感君子不遇。大道無傷也。

感遇詩

張九齡

孤鴻海上來。池潢不敢顧。側見雙翠鳥。巢在三珠樹。
矯矯珍木巔。得無金丸懼。美服患人指。高明逼神惡。
今我游冥冥。弋者何所慕。

比也。感哲人之隱德以求遜也。

詠史

左思

濟濟京城內。赫赫王侯居。冠蓋蔭四術。朱輪竟長衢。
朝集金張館。暮宿許史廬。南鄰擊鍾磬。北里吹笙竽。
寂寂楊子宅。門無卿相輿。寥寥空宇內。所講在玄虛。
言論准宣尼。詞賦擬相如。悠悠百世後。英名擅八區。
賦也。感富貴無常。惟德言可久也。

詠史

張孟陽

昔在西京時。朝野多歡娛。藹藹東都門。羣公祖二疎。
朱軒曜金城。供帳臨長衢。達人知止足。遺榮忽如無。
抽簪解朝衣。散髮歸海隅。行人爲噴涕。賢哉此大夫。

揮金樂當年。歲暮不留儲。顧謂四座賓。多財爲累患。
賦也。感仕宦之知幾也。

感舊詩

曹顏遠

富貴他人合。貧賤親戚離。棄蘭門易軌。田實相奪移。
晨風集茂林。棲鳥去枯枝。今我唯困蒙。羣士皆背馳。
鄉人敦懿義。濟濟蔭光儀。對賓頗有客。舉觴詠露斯。
臨樂何所嘆。素絲與路岐。

賦也。感時交不足恃。惟親舊可常也。

庭前甘菊花

杜甫

庭前甘菊移時晚，青萼重陽不堪摘。明日蕭條盡
醒，殘花爛熳開何益。籬邊野外多衆芳，采
中堂念茲空長大枝葉。結根失所纏風霜，
比也感君子過時之晚，功不成也。

逸民

梁武帝

如壘生木，木有異心。如林鳴鳥，鳥有殊音。如江游魚，
魚有浮沉。巖巖山高，湛湛水深。事迹易見，理相難尋。
與逸感逸民之出類而不羣也。

南山有高樹

韓愈

南山有高樹。花葉何葳蕤。上有鳳皇巢。鳳皇乳且棲。
四旁多長枝。羣鳥所托依。黃鵠據其高。衆鳥接其卑。
不知何山鳥。羽毛有光輝。飛飛擇所處。正得衆所希。
上承鳳皇恩。自期永不衰。中與黃鵠羣。不自隱其私。
下視衆鳥羣。汝徒竟何爲。不知挾九子。心默有所規。
彈汝枝葉間。汝翅不覺摧。或言由黃鵠。黃鵠豈有之。
慎勿猜衆鳥。衆鳥不足猜。無人語鳳皇。汝屈安得知。
黃鵠得汝去。婆娑弄毛衣。前汝下視鳥。各議汝瑕疵。
汝豈無朋匹。有口莫肯開。汝落蒿艾間。幾時復能飛。

哀哀故山友，中夜思汝悲。路遠翅翎短，不得持汝歸。
比也。感仕宦之易厄，朋黨相傾也。

王昭君歌

劉長卿

自矜嬌艷色，不顧丹青人。誰知粉繪能相負，却使容華翻誤身。

比也。士自負才德而賈禍也。

架水藤

姚合

蒙蒙紫花藤，下覆清溪水。若遣隨波流，不如風飄起。
風飄或近人，隨波千萬里。

比也。感上下飄流。貴所止也。

楊白花

柳宗元

楊白花。風吹渡江水。坐令官樹無顏色。搖蕩春光千萬里。茫茫曉日下長秋。哀歌未斷城鴉起。

比也。小人搖蕩。感其無成。

林亭寓言

張九齡

林居逢歲宴。遇物使情多。蘅茝不時與。芡榮奈汝何。更憐籬下菊。無如松上蘿。因依自有命。非是隔陽和。賦而比也。感時不遇也。

感遇

蘭葉春葳蕤，桂華秋皎潔。欣欣似生意，自爾爲佳節。
誰知林棲者，聞風坐相悅。草木有本心，何求美人折。
比也。君子自得，不求人知也。

集古惜時三

詠懷詩

春庭晚望

書屏風詩

庭梅詠

長歌行

悲哉行

蒲生行

梅花落

古樂府雜怨

獨愁

短歌行

嘆白髮

怨別

覽鏡

城上草

宴城東莊

芳樹

長安道

日晚歌

野菊生秋澗

集古惜時目終

集古惜時三

二十三首

詠懷詩

阮嗣宗

嘉樹下成蹊。東園桃與李。秋風吹飛藿。零落從此始。
繁華有。憔悴堂上生。荆杞驅馬舍之去。去上西山
陲。一身不自保。何況戀妻子。凝霜被草野。歲暮亦云
已。

興也。桃李有實。蓬藿無根。惜失時也。

天馬出西郭。由來從東道。春秋非有託。富貴焉常保。
清露被臯蘭。凝霜霑野草。朝爲媚少年。夕暮成醜老。

自非王子晉誰能常美好

與也惜時易邁年華可傷也

平生少年時輕薄好絃歌西遊咸陽中趙李相經過
娛樂未終極白日忽蹉跎驅馬復來歸反顧望三河
黃金百鎰盡資用常苦多北臨太行道失路將如何
賦也惜豪華不定樂極悲來

昔聞東陵瓜近在東門外連畛距阡陌子母相鈎帶
五色曜朝日嘉賓四面會膏火自煎熬多財爲患害
布衣可終身寵祿豈足賴

賦而比也。瓜熟蔓落，甘者自竭也。

春庭晚望

蕭 慤

春庭聊縱望，樓臺自相隱。窗梅落晚花，池竹開初筍。
泉鳴知水急，雲來覺山近。不愁花不飛，到畏花飛盡。
賦而比也。梅落花飛，芳名易歇。

書屏風詩

太義公主

盛衰等朝暮，世道若浮萍。榮華實難守，池臺終自平。
富貴今何在，空自寫丹青。盃酒恒無樂，絃歌詎有聲。
余本皇家子，飄流入虜庭。一朝覩成敗，懷抱忽縱橫。

古來共如此。非我獨申名。唯有明君曲。偏傷遠嫁情。
賦也。惜境遇多遷。榮華易盡。

庭梅詠

張九齡

芳意何能早。孤榮亦自危。更憐花蒂弱。不受歲寒移。
朝雪那相妬。陰風已屢吹。聲音雖尚爾。飄蕩復誰知。
比也。君子知孤榮難立。惜飄零也。

長歌行

李白

桃李待日開。榮華照當年。東風動百物。草木盡欲言。
枯枝無醜葉。涸水吐清泉。大力運天地。義和無停鞭。

功名不早著。竹帛將何宣。遊李務青春。誰能貴白日。
富貴與神仙。蹉跎成兩失。金石猶銷鑠。風霜無久質。
畏落日月後。強歡歌與酒。秋霜不惜人。倏忽侵蒲柳。
賦而興也。惜蒲柳易謝。貴早修也。

悲哉行

王昌齡

勿聽白頭吟。人間易憂怨。若非滄浪子。安得從所願。
北上太行山。臨風閱吹萬。長雲數千里。倏忽還膚寸。
觀其微滅時。精意莫能論。百年不容息。是處生意蔓。
始悟海上人。辭君永飛颺。

賦也。雲氣倏忽，百年瞬息。

蒲生行

謝朓

蒲生廣湖邊。託身洪波側。春露惠我澤。秋霜奪我色。
根葉從風浪。常恐不永植。攝生各有命。豈云智與力。
安得遊雲上。與爾同羽翼。

比也。惜託身之不堅，貴攝生也。

梅花落

鮑照

中庭雜樹多。偏爲梅客。嗟問君何獨然。念其霜中能
作花。露中能作實。捭蕩春風媚春日。念爾零落逐寒

風徒有霜華無霜質。

比也。惜君子之有華無實也。

古樂府雜怨

孟郊

天桃花。清晨遊女紅粉新。天桃花。薄暮遊女紅粉故。
樹有百年花。人無一定顏。花送人老盡。人悲花自閒。
比也。惜少年也。

獨愁

前日遠別離。昨日生白髮。欲知萬里情。曉臥半床月。
常恐百蟲鳴。使我芳草歇。

賦也。惜情爲形累，終不及時。

短歌行

王建

人初生，日初出，上山遶下山疾。百年三萬六千朝，夜裏分將強半日。有歌有舞聞早爲，昨日健於今日時。人家見生男女好，不知男女催人老。短歌行，無樂聲。賦也。石火電光，說來沒趣。

嘆白髮

王維

我年亦何長，鬢髮日已白。俛仰天地間，能爲幾時客。惆悵故山雲，徘徊空日夕。何事與時人，東城復南陌。

賦也。嗚呼老矣。惜不知止也。

怨別

孟郊

一別一回老。志士白髮早。在富易爲容。在貧難自好。
沉憂損性靈。服藥亦枯槁。秋風遊子衣。落日行遠道。
君問去何之。賤身難自保。

賦也。人爲貧富所遷。靡有定也。

覽鏡

邵謁

一照一回悲。再照顏色衰。日月自流水。不知身老時。
昨日照紅顏。今朝照白絲。白絲與紅顏。相去咫尺間。

賦也。悲失時也。

城上草

劉侯

城上草。植根非不高。所恨風霜早。

比也。惜小人託身不固也。

宴城東莊

崔惠童

一月主人笑幾回。相逢相識且啣杯。眼看春色如流水。今日殘花昨日開。

賦而比也。惜春華易落。笑口難開也。

芳樹

盧照隣

芳樹本多奇，年華復在斯。結翠成新幄，開紅滿故枝。
風歸花歷亂，日度影參差。容色朝朝落，思君君不知。
比也惜失時也，衰落不知歸也。

長安道

韋應物

漢家宮殿含雲煙，兩宮十里相連延。晨霞出沒弄丹
闕，春雨依微自甘泉。春雨依微春尚早，長安貴遊愛
芳草。寶馬橫來下建章，香車却轉避馳道。貴遊誰
貴，衛霍世難比。何能蒙主恩，幸遇邊塵起。歸來甲第
拱皇居，朱門幾幾臨九衢。中有流蘇合歡之寶帳，一

百二十鳳皇羅列含明珠下有錦鋪翠被之燦爛博
山吐香五雲散麗人綺閣情飄飄頭上鴛鴦雙翠翹
低鬟曳袖回春雪聚黛一聲愁碧霄山珍海錯弃藩
籬烹犢包羔如折葵既請列侯封部曲還將金印授
盧兒歡榮若此何所苦但苦白日西南馳

賦也歷言權勢豪華終歸淪滅惜之也

日晚歌

顧況

日宵宵兮下山望佳人兮不還花落兮屋上草生兮
階間日日兮春風芳菲兮欲歇老不可兮更少君胡

爲今輕別。

賦而興也。惜佳人之不遇。

野菊生秋澗

蘇軾

野菊生秋澗。芳心空自知。無人驚歲晚。唯有暗蛩悲。
花開澗水上。花落澗水濱。菊衰蛩亦蛰。與汝歲相期。
楚客方多感。秋風詠江蓠。落英不滿掬。何以慰朝饑。
比也。君子不遇其時。孤芳自惜也。

集古惜時卷終

集古悲往四

古大梁行

北却行

寒食行

古行路難

經廢宅

始皇陵

金谷

銅雀臺

銅雀臺

銅雀妓

銅雀妓

短歌行

長歌行

馬嵬

隋宮

金陵

凌歊臺

驪山

孟城坳

野田

惜花

綺繡宮

登樂遊原

龍池

瑤池

越王臺

吳宮

汾陽舊宅

靈巖寺

和子由澠池懷舊

挽永樂文長老

薤露

蒿里

代挽歌

悲往月終

集古悲往四 三十四首

古大梁行

高適

古城莽蒼饒荆棘。驅馬荒城愁殺人。魏王宮觀盡禾黍。
信陵賓客隨灰塵。憶昨雄都舊朝市。軒車照耀歌鍾起。
軍容帶甲三十萬。國步連營五千里。全盛須臾那可論。
高臺曲池無復存。遺墟但見狐狸跡。古地空餘草木根。
暮天搖落傷懷抱。撫劍悲歌對秋草。俠客猶傳朱亥名。
行人尚識夷門道。白壁黃金萬戶侯。寶刀駿馬填山丘。
年代淒涼不可問。往來惟見水東流。

賦也。富貴英雄，隨塵俱滅。達者悲之。

井卬行

王建

北卬山頭少閒土，盡是洛陽人舊墓。舊墓人家歸葬
多，堆著黃金無置處。天涯悠悠葬日促，岡坂崎嶇不
停轂。高張素幙繞銘旌，夜唱挽歌山下宿。洛陽城北
復城東，魂車祖馬長相逢。車轍廣若長安路，蒿草多
於松柏樹。淵底盤陀石漸稀，盡向墳前作羊虎。誰家
古碑文字滅，後人重取書年月。朝朝車馬送葬歸，還
起大宅與高臺。

賦也悲生歿無盡人不知止也

寒食行

寒食家家出古城。老人看屋少年行。丘隴年年無舊
道。車徒散行入衰草。牧童驅牛下塚頭。畏有人家來
洒掃。遠人無墳水頭祭。還引婦姑望鄉拜。三日無火
燒紙錢。紙錢那得到黃泉。但看隴上無新土。此中白
骨應無主。

賦也悲人命不常澹世味也

古行路難

李頎

漢家名臣楊德祖。四代五公享第土。父子兄弟綰銀黃。
驪馬鳴珂朝建章。火浣單衣繡方領。茱萸錦帶玉盤囊。
賓客填街復滿座。片言出口生輝光。世人慕勢爭奔走。
瀝膽隳肝惟恐後。當時一顧登青雲。自謂生歿長隨君。
一朝謝病還鄉里。窮巷蒼苔絕知己。秋風落葉閉重門。
昨日論交竟誰是。薄俗嗟嗟難重陳。淡山麋鹿可爲隣。
魯連所以蹈東海。古往今來稱達人。賦也勢盡交絕。
榮華如夢。

經廢宅

杜荀鶴

人生當貴盛。脩德可延之。不慮有今日。爭教無破時。
薛班題字壁。花發帶巢枝。何況蒿原上。荒墳與折碑。
賦也。悲盛不知衰。惟德可久。

始皇陵

曹 鄴

千金買魚燈。泉下照狐兔。行人上陵過。却吊扶蘇墓。
累累墳中物。多於養生具。若使山可移。應將秦國去。
舜及雖在前。今猶未封樹。

賦也。貪性無厭。雖死猶迷。勢不勝德。
金谷

太守龍爲馬，將軍金作車。香風十里風，風下綠珠歌。
莫怪坐土客，嘆君庭前花。明朝此池館，不是石崇家。
賦也。千年田地，非一主人。

銅雀臺

劉長卿

嬌愛更何日。高臺空數層。含啼映雙袖，不忍看西陵。
漳水東流無復來，百花顰路爲蒼苔。青樓月夜長寂
寞，碧雲日暮空徘徊。君不見鄴中萬事非昔時，古人
不在今人悲。春風不逐君王去，草色年年舊宮路。宮
中歌舞已浮雲，空指行人往來處。

又

沈佺期

昔年分鼎地。今日望陵臺。一旦雄圖盡。千秋遺令開。
綺羅君不見。歌舞妾空來。恩共漳河水。東流無重回。
賦也君不見。妾空來。是何情景。

銅雀妓

李邕

西陵望何及。絃管徒在茲。誰言灰者樂。但令生者悲。
丈夫有餘志。兒女焉足私。擾擾多俗情。投跡互相師。
直節豈感激。荒淫乃淒其。潁水有許由。西山有伯夷。
頌聲何寥寥。唯聞銅雀詩。君舉良未易。永爲後代嗤。

賦也。悲見女不足私，惟德操可承。

又

王勃

金鳳降銅雀，漳河望鄴城。君王無處所，臺榭若平生。
舞筵紛何就，歌梁儼未傾。西陵松楸冷，誰見綺羅情。
賦也。悲分香散履之人，非英雄也。

短歌行

顧況

城邊路，今人犁田昔人墓。岸上沙，昔時江水今人家。
今人昔人共長嘆，四序相催節回換。明月皎皎入華
池，白雲離離度青漢。

賦也。滄海桑田，雲飛月落。

長歌行

王昌齡

曠野饒非風，颼颼多蒿草。繫馬倚白楊，誰知我懷抱。
所是同袍者，相逢盡衰老。況登漢家陵，南望長安道。
上有枯樹根，下有石鼠窠。高皇子孫盡，千載無人過。
寶玉頻發掘，精靈其奈何。

賦也。年華易逝，生歎難保。

馬嵬

海外徒聞更九州，他生未卜此生休。空聞虎旅鳴宵

析無復難人報曉籌。此日六軍同駐馬。當時七夕笑牽牛。如何四紀爲天子。不及盧家有莫愁。

賦也。悲風流佚蕩之難再也。

隋宮

紫泉宮殿鎖煙霞。欲取蕪城作帝家。玉璽不緣歸日角。錦帆應是到天涯。於今腐草無螢火。終古垂楊有暮鴉。地下若逢陳后主。豈宜重問后庭花。

賦也。悲陳隋報應一律。

金陵

許渾

玉樹歌殘王氣終，景陽兵合戍樓空。
楸梧遠近千宮塚，禾黍高低六代宮。
石燕拂雲晴亦雨，江豚吹浪夜還風。
英雄一去豪華盡，惟有青山似洛中。

賦也。悲人事易遷，山川如故。

凌歊臺

宋祖凌歊樂未回，三千歌舞宿層臺。
湘潭雲盡暮山出，巴蜀雪消春水來。
行殿有基荒薺合，寢園無主野棠開。
百年便作萬年計，巖畔古碑空綠苔。

賦也。嘆荒淫之不再，國陵丘墟矣。

驪山

聞說先皇醉碧桃。日華搖動鬱金袍。風隨玉輦笙歌迴。雲卷珠簾劍佩高。鳳駕北歸春寂寂。龍輿西幸水涓涓。蛾眉沒後巡遊少。瓦落宮牆見野蒿。

賦也。樂極生悲也。

孟城坳

裴迥

結廬古城下。時登古城上。古城非疇昔。今人自來往。賦也。悲江河日下。

野田

張籍

漠漠野田草。草中牛羊道。古墓無子孫。白楊不得老。
賦也。悲塚墓必歸於盡。沉人事乎。

惜花

山中春已晚。處處見花稀。明日來無盡。林間宿不歸。
比也。悲時謝也。

綺繡宮

王建

玉樓傾側粉牆空。重叠青山繞故宮。武帝去來紅袖
盡。野花黃蝶領春風。

賦也。悲樓臺之幻景。隨人盡矣。

登樂遊原

杜牧

長安。澹。澹。孤。鳥。沒。萬。古。銷。沉。向。此。中。看。取。漢。家。何。事。
業。五。陵。無。樹。起。秋。風。

興也五陵無樹鳥滅長空矣

龍池

李商隱

龍池。賜。酒。敞。雲。屏。羯。鼓。聲。高。衆。樂。停。夜。半。燕。歸。宮。漏。
永。薛。王。沉。醉。壽。王。醒。

賦也譏玄宗之亂也

瑤池

瑤池阿母綺窗開，黃竹歌聲動地哀。
八駿日行三萬里，穆王何事不重來。

賦也。悲求仙之無憑，終歸於盡。

越王臺

越王勾踐破吳歸，義士還家盡錦衣。
官女如花滿春殿，至今惟有鷓鴣飛。

賦也。悲霸業不足恃也。

吳宮

龍盤虎踞水雲清，禁門深掩斷人聲。
吳王宴罷能滿宮。

醉日暮水漂花出城

賦也吳宮花草悲日易暮也

汾陽舊宅

趙嘏

門前不改舊山河、破虜曾經馬伏波、今日獨經歌舞地、古槐疎冷夕陽多、

賦也悲功業如夢甲第成塵也

靈巖寺

館娃宮畔千年寺、水濶雲多客到稀、聞說春來倍惆悵、百花深處一僧歸、

賦也。浮華有盡，空寂無窮。

和子由澠池懷舊

蘇軾

人生到處知何似。應似飛鴻踏雪泥。泥上偶然留指
爪。鴻飛那復計東西。老僧已死成新塔。壞壁無由見
舊題。往日崎嶇還記否。路長人困蹇驢嘶。

賦而比也。鴻飛雪冷，見現在非真。

挽永樂文長老

初驚鶴瘦不可識。旋覺雲歸無處尋。三過門間老病
減。一彈指頃去來今。存亡慣見渾無淚。鄉井難忘尚

有心欲向錢塘訪圓澤。葛洪川畔待秋溪。

賦也。鶴瘦雲歸原同寂滅。

薤露

古辭

薤上露何易晞。露晞明朝更復落。人歿一去何時歸。
比也。悲人歿也。澹貪生者之心也。

蒿里

蒿里誰家地。聚歛魂魄無賢愚。鬼伯一何相催促。人
命不得少踟躕。

賦也。人命奄忽可以休矣。

代挽歌

鮑照

獨處重冥下。憶昔登高臺。傲岸平生中。不爲物所裁。
挺門只復閉。白蟻相將來。生時芳蘭體。小蟲今爲災。
玄鬢無復根。骷髏依青苔。憶昔好飲酒。素盤進青梅。
彭韓及廉藺。壽昔已成灰。壯士皆歿盡。餘人安在哉。
賦也爲時人。画一圖。自悲自挽。

集古非徒集

集古幽憤五

清誠

絕交詩

雀飛多

秦家行

病鴟

秋日

寫懷

病栢

縛雞行

猛虎行

猛虎行

義鵲行

大嘴鳥

射訓狐

鶴媒歌

苦樂相倚曲

解愁

遺興

食雉

劍客

古詩

集古幽憤目終

天東

卷十二

幽憤目二

集古幽憤五

二十一首

清誠。

高彪

天長而地久，人生則不然。又不養以福，使全其壽年。
飲酒病我性，思慮害我神。美色伐我命，利欲亂我真。
神明無聊賴，愁毒於衆煩。中年棄我逝，忽若風過山。
形氣各分離，一往不復還。上士愍其痛，抗志凌雲煙。
滌蕩去穢累，飄逸任自然。退修清以淨，存吾玄中玄。
澄心剪思慮，泰清不受塵。恍忽中有物，希微無形端。
智慮赫赫盡，谷神綿綿存。

賦也。憂人生之易沉，憤墮落也。

絕交詩

朱穆

北山有鴟，不潔其翼。飛不正向，寢不定息。饑則求覓，飽則泥伏。饕餮貪汗，臭腐是食。填腸滿臆，嗜欲無極。長鳴呼鳳，謂鳳無德。鳳之所趨，與子異域。永從此訣，各自努力。

賦而比也。鴟，鳳不同途，憤敗類也。

雀飛多

張籍

雀飛多，觸網羅。網羅高樹巔，汝飛蓬蒿下。勿復投身

細羅間粟積倉禾在田巢之雛望其母來還
比也憤小人以利殺身

秦家行

無名氏

華宇飛光照天地九天瓦裂屯冤氣鬼哭聲聲怨趙
高宮花滴盡扶蘇淚禍起蕭牆不知戢羽書催築長
城急劍上忠臣血未乾沛公已向函關入
賦也憤勢不足恃而大禍隨之

病鴉

韓愈

屋東惡水溝有鴉墮鳴悲青泥掄兩翅拍拍不得離

羣童叫相召。瓦礫爭先之計。校生平事。殺却理亦宜。
奪攘不愧耻。飽滿盤天嬉。晴日占光景。高風送追隨。
遂凌紫鳳羣。肯顧鴻鵠卑。今者命運窮。遭逢巧九兒。
中汝要害處。汝能不得施。於吾乃何有。不忍乘其危。
丐汝將死命。浴以清水池。朝餐輟魚肉。暝宿防狐狸。
自知無以致。蒙德久猶疑。飽入淡竹蕲。飢來傍階基。
亮無責報心。固以聽所爲。昨日有氣力。飛跳弄藩籬。
今晨忽徑去。曾不報我知。僥倖非汝福。天衢汝休窺。
京城事彈射。豎子豈易欺。勿諱泥坑辱。泥坑乃良規。

比也。憤小人受恩，終於負義也。

秋日

耿湣

返照入閨巷，憂來與誰語。古道無人行，秋風動禾黍。
賦而興也。悲時懷古，感慨係之矣。

寫懷

杜甫

夜坐南軒，明月照我膝。驚風翻河漢，梁棟已出日。
羣生各一宿。飛動自儔匹。吾亦驅其兒，營營爲私實。
天寒行旅稀，歲暮日月疾。榮名忽中人，世亂如蟣虱。
古者三皇前，滿腹志願畢。胡爲有結繩，陷此膠與漆。

禍首燧人氏。厲階董狐筆。君看燈燭張。轉使飛蛾密。
放神八極外。俛仰俱蕭瑟。終契如往還。得匪合仙術。
賦也憤人心之千古。營於私念也。

病栢

有栢生崇岡。童童狀車蓋。偃蹇龍虎姿。主當風雲會。
神明依正直。故老多再拜。豈知千古根。中路顏色壞。
出非不得地。盤據亦高大。歲寒忽無憑。日夜柯葉敗。
丹鳳領九雛。哀鳴翔其外。鵬鶚志意滿。養子穿穴內。
客從何鄉來。佇立久吁怪。靜求元精理。浩蕩難倚賴。

比也。憤君子之失時，改操傷歲寒也。

縛雞行

小奴縛雞向市賣，雞被縛急相喧爭。家中厭雞食蟲
蟻，不知雞賣還遭烹。蟲雞於人何厚薄，吾叱奴人解
其縛。雞蟲得失無了時，注目寒江倚山閣。

比也。雞蟲中俱有佛性天道。

猛虎行

張籍

南山北山樹冥冥，猛虎白日繞林行。向晚一身當道
食，山中麋鹿盡無聲。年年養子在空谷，雌雄山上不

相逐谷中。近窟有山林。長向村家取黃犢。五陵年少不敢射。空來林下看行跡。

比也。言權勢殺人。無敢逆之者。

猛虎行

韓愈

猛虎雖云惡。亦皆有匹儕。羣行淡谷間。百獸望風低。身食黃熊父。子食赤豹麋。擇肉於熊豹。肯視兔與狸。正晝當谷眠。眠有百步威。自矜無當對。氣性縱以乖。朝怒殺其子。暮還食其妃。匹儕四散走。猛虎還孤棲。孤鳴門兩傍。鳥鵲從噪之。出逐狹入居。虎不知所歸。

誰云猛虎惡。中路正悲啼。豹來銜其尾。能來攫其脾。
猛虎成不辭。但慚前所爲。虎坐無助處。泥如汝細微。
故當結以信。親當結以私。親故且不保。人誰信汝爲。
賊而比也。橫行終無結局。憤獨夫也。

義鵲行

杜甫

陰蜺有蒼鷹。養子黑山巔。白蛇登其巢。吞噬恣朝餐。
雄飛遠求食。雌者鳴辛酸。力強不可制。黃口無半存。
其父從西歸。翻身入長煙。斯須領健鵲。痛憤寄所宣。
斗上挾孤影。嗷嗷來九天。修鱗脫遠枝。巨鰲折老拳。

月
三
高空得暗燈。短草辭蛇蟻。折尾能一掉。飽腸已皆穿。
生雖滅衆難。死亦垂千年。物情有報復。快意貴目前。
茲實驚易最。急難心炯然。功成失所往。用舍何其賢。
近經滴水瀝。此事樵夫傳。飄蕭覺素髮。凜欲衝儒冠。
人生許與分。只在傾吟間。聊爲義鵲行。用激壯士肝。
賦而比也。憐鷹憤蛇。褒鵲俱有報應。

大嘴鳥

白居易

鳥者種有二。名同性不同。嘴小者慈孝。嘴大者貪庸。
嘴大命又長。生來十餘冬。物老顏色變。頭毛白茸茸。

飛來庭樹上。初但驚兒童。老巫生奸計。與鳥意潛通。
云是非凡鳥。遙見起敬恭。千歲乃一出。喜賀主人翁。
祥瑞來白日。神靈占知風。陰作北斗使。能爲人吉凶。
此鳥所止家。家產日夜豐。上以致壽考。下可互田農。
主人富家子。身老心童蒙。隨巫拜復祝。婦姑亦相從。
殺雞薦其肉。敬若禋六宗。鳥喜張大嘴。飛接在虛空。
鳥旣飽羶腥。巫亦饗甘濃。鳥巫互相利。不復兩西東。
日日營巢窟。稍稍近房櫳。雖生八九子。誰辨其雌雄。
羣雛又長成。聚哺逞殘兇。採巢吞燕卵。入簇啄蚕蟲。

豈無乘秋隼。羈絆委高墻。但食鳥殘肉。無施搏擊功。
亦有能言鵲。翅碧嘴距紅。暫曾說鳥臯。因閉在淡籠。
青青窗前柳。鬱鬱井上桐。貪鳥占棲息。慈鳥獨不容。
慈鳥爾奚爲。來往何憧憧。曉去先晨鼓。暮歸後昏鐘。
辛苦塵土間。飛啄禾黍籠。得食將母哺。饑腸不自充。
主人憎慈鳥。命子削彈弓。絃續會稽竹。丸鑄荆山銅。
慈鳥求母食。飛下爾庭中。數粒未入口。一丸已中胸。
仰天號一聲。似欲訴蒼穹。反哺日未足。非是惜微躬。
誰能待比寬。一爲問化工。胡然大嘴鳥。竟得天年終。

比也。小人得位，君子失時也。

射訓狐

韓愈

有鳥夜飛，名訓狐。矜凶挾狡，誇自呼。乘時陰黑，止我
屋。聲勢慷慨，非常態。安然大喚，誰畏忌。造作百怪，非
無須。聚鬼徵妖，自朋扇。擺掉拱桷，頽壁塗。慈母抱兒
怕入席。那暇更護雛，窠雛。我念乾坤德泰大，卯此惡
物常勤劬。縱之豈即遽有害，斗柄行挂西南隅。誰
停奸諂尤劇，意欲唐突羲和鳥。侵更歷漏氣，彌厲何
由僥倖休須臾。奉余往射，豈得已。候女两眼張睢盱，

果散。墮。梁。蛇。走。竇。一。夫。斬。頸。羣。雛。枯。

比也。喻小人逞凶終不得其成也。

鶴媒歌

高季迪

鶴媒獨步荒陂水。仰望雲間不飛起。遠呼過鳥下南汀。鼓翼相迎似相喜。共爲羽族生水鄉。暫從飲啄無猜防。草盾俄開中替弩。弋師謹笑媒矜舞。差爾高縈非凡禽。胡爲徇食移此心。受人馴養忘遠舉。好陷同類。機。腸。淡。

比也。憤君子同類相陷見利忘義也。

苦樂相倚曲

元 稹

古來苦樂之相依。近於掌上之十指。君心半夜猶恨
生。荆棘滿懷天未明。漢成眼瞥飛燕時。可憐班女思
已衰。未有因由相決絕。猶得半年佯援熱。轉將淡意
論傍人。緝綴疵瑕遺潛說。一朝詔下辭金屋。班姬自
痛何倉卒。呼天俯地將自明。不悟尋時已銷骨。白首
宮人前再拜。願將日月相輝解。苦樂相尋晝夜間。燈
光那有天明在。主今被奪心應苦。妾奪淡恩初爲主。
欲知妾意恨主時。主今爲妾思量取。班姬收淚抱妾

身我曾排擯無限人。

賦而比也。在官在朝。眼前業因。

解愁。

微霜纔結露。翔鵠初變鷹。無乃天地意。使之行小懲。
鵠鵠誠可惡。蔽目有高鵬。捨大以撿細。我心終不能。
比也。鵠化爲鷹。憤天地不能不殺。

遣興

杜甫

猛虎馮其威。往往遭急縛。雷吼徒咆哮。枝撐已在脚。
忽看皮褫處。無復睛閃爍。人有甚於斯。足以勸元惡。

比也。惡人報應，說得敗興。

又

朝逢富家葬，前後皆輝光。共指親戚大，總麻百夫行。
送者各有歎，不須羨其強。君看束縛去，亦得歸山岡。
此也。貧富同一結局，不必誇外也。

食雉

蘇軾

雄雉曳修尾，驚飛向日斜。空中紛格鬪，綵羽落如花。
喧呼勇不顧，投網復誰嗟。百錢得一雙，新味時所佳。
烹煎雜鵝鶩，水陸漫槎牙。誰知化爲蜃，海上落飛鴉。

比也。憤士不能潛，自罹於羅也。

劍客

齊己

拔劍遶殘尊，歌終便出門。
西風滿天雪，何處報人恩。
勇於尋常事，輕離不足論。
翻嫌易水上，細碎動離魂。
賦也。歟。難士之小節。君子以義爲上。

古詩

甘瓜抱苦蒂，美棗生荆棘。
利傍有倚刀，貪人還自賊。
比也。憤貪利自殺者。

集古知命六

勵志

善哉行

擬作

猗蘭操

君子法天運

時興

古風

野田黃雀行

牆上難爲趨行

猛虎詞

春日醉起言志

遊終南

詠聲

詠風

山夜聞鐘

襍詩

聽江水聲

古松感興

幽人

聽彈松入風

早靜

雜詩

幽居

步虛詞

歸田園居

飲酒

江上漁者

古意

蠶婦

開牖軒

次韻定慧欽長老

客去室

出門

集古知命目終

集古知命六

縣志

張華

大儀幹運、天田地游、四氣鱗次、寒暑環周、星火既夕、
忽焉素秋、涼風振落、熠燿宵流、雖有淑姿、放心縱逸、
出般於游、居多暇日、如彼梓材、弗勤丹漆、雖勞樸斲、
終負素質、養由矯矢、獸號於林、蒲盧縈繳、神感飛禽、
末伎之妙、動物應心、研精就道、安有幽淡、吉士思秋、
實感物化、日與月與、荏苒代謝、逝者如斯、曾無日夜、
嗟爾庶士、胡寧自舍、仁道不遐、德輳如羽、求焉斯至、

衆鮮克舉。大猷玄漠。將抽厥緒。先民有作。貽我高矩。
安心恬蕩。棲志浮雲。體之以質。彪之以文。如彼南岫。
力耒旣勤。麓蓑致功。必有豐殷。水積成川。載瀾載清。
積土成山。歆烝鬱冥。山不讓塵。川不辭盈。勉爾含弘。
以隆德聲。高以下基。洪由纖起。川廣自源。成人在始。
累微以著。乃物之理。纏牽之長。實累千里。復禮終朝。
天下歸仁。若金受礪。若泥在鈞。進德脩業。晞光日新。
臨明仰慕。予亦有人。

賦也。言命之不已。貴自脩也。

善哉行

古辭

春日大難。口燥唇乾。今日相樂。皆當喜歡。經歷名山。
芝草離離。仙人王喬。逢藥一丸。自惜袖短。內手知寒。
慙無靈輒。以報趙宣。月沒參橫。北斗闌干。親交在門。
飢不及食。歡日尚少。戚日苦多。以何忘憂。彈箏酒歌。
淮南八公。要道不煩。參駕六龍。遊戲雲端。

賦而比也。大道不煩。知命無憂。

擬作

魏文帝

上山采薇。薄暮苦饑。溪谷多風。霜露沾衣。野雉羣雛。

猿猴相追。還望故鄉。鬱何壘壘。高山有崖。林木有枝。
憂來無方。人莫之知。人生如寄。多憂何爲。今我不樂。
歲月其馳。湯湯川流。中有行舟。隨波轉薄。有似客遊。
策我良馬。被我輕裘。載馳載驅。聊以忘憂。
興也知命則樂。息衆動也。

倚蘭操

騁愈

蘭之猗猗。揚揚其香。不采而佩。於蘭何傷。今天之旋。
其曷爲然。我行四方。以日以年。雪霜貿貿。薺麥之茂。
于如不傷。我不爾觀。薺麥之茂。薺麥之有。君子之傷。

君子之安。

比也。君子以命自安，知希者貴。

君子法天運

君子法天運。四時可前知。小人唯所遇。寒暑不可期。
利害有常勢。取舍無定姿。焉能使我心。皎皎遠憂疑。
賦也。君子俟命。小人行險也。

時興

盧子諒

臺臺圓象運。悠悠方儀廓。忽忽歲云暮。遊原采蕭藿。
壯道中與河。南臨伊與洛。凝霜霑蔓草。悲風振林薄。

撼撼芳葉零。蕊蕊芬華落。下泉激冽清。曠野增遼索。
登高眺遐荒。極望無崖壑。形變隨時化。神感因物作。
澹乎至人心。恬然守玄漠。

賦也。知元化之無盡。守而不遷也。

古風

李白

世道日交喪。澆風散淳源。不采芳桂枝。反棲惡樹根。
所以桃李樹。吐花竟不言。大運有興沒。羣動爭飛奔。
歸來廣成子。去入無窮門。

賦也。嘆本衰殘。不信命也。

鳳。饑。不。啄。粟。所。食。唯。琅。玕。焉。能。與。羣。鷄。刺。盛。爭。一。食。
朝。鳴。崑。丘。樹。夕。飲。砥。柱。湍。歸。飛。海。路。遠。獨。宿。天。霜。寒。
幸。遇。王。子。晉。結。交。青。雲。端。懷。恩。未。得。報。感。別。空。長。嘆。
賦。也。至。人。獨。立。世。表。也。

莊。周。夢。蝴。蝶。蝴。蝶。爲。莊。周。一。體。更。變。化。萬。事。良。悠。悠。
乃。知。蓬。萊。水。復。作。淺。清。流。青。門。種。瓜。人。舊。日。東。陵。侯。
富。貴。固。如。此。營。營。何。所。求。

賦。而。比。也。萬。物。歸。虛。惟。命。有。常。

野。田。黃。雀。行

曹。植

置酒高殿上。親交從我遊。中厨辦豐膳。烹羊宰肥牛。
秦箏何慷慨。齊瑟和且柔。陽阿奏奇舞。京洛出名謳。
樂飲過三爵。緩帶傾庶羞。主稱千金壽。賓奉萬年酬。
久要不可忘。薄終義所尤。謙謙君子德。磬折欲何求。
盛時不再來。百年忽我道。驚風飄白日。光景馳西流。
生存華屋處。零落歸山丘。先民誰不歿。知命復何憂。
賦也及時修。業生歟一觀。

牆上難爲趨行

傅休奔

門有車馬客。驟服若騰飛。革組結玉佩。繁藻紛葳蕤。

馬軼垂長纓。顧盼有餘輝。貧主屣弊履。整比藍縷衣。
客曰嘉病乎。正色意無疑。吐言若覆水。搖舌不可追。
涓濱漁釣翁。乃爲周所諮。顏回處陋巷。大聖稱庶幾。
苟富不知度。千駟賤采薇。季孫由儉顯。管仲病三歸。
夫差耽淫侈。終爲越所圍。遺身外營利。然後享巍巍。
迷者一何衆。孔難知德希。甚美致憔悴。不如豚豕肥。
楊朱泣路岐。失道令人悲。子貢欲自矜。原憲知其非。
屈伸各異勢。窮達不同資。夫唯體中庸。先天矢不違。
賦也。富不可驕。貧不可詘。知命自得。

猛虎詞

儲光義

寒亦不憂雪。饑亦不食人。人肉豈不甘。所惡傷神明。
太室爲我宅。孟門爲我隣。百獸爲我膳。五龍爲我賓。
蒙馬一何威。浮江亦以仁。彩章耀朝日。爪牙雄武臣。
高雲逐氣浮。厚地隨聲震。君能賈餘勇。日夕長相親。
比也。大人虎變。具仁義也。

春日醉起言志

李白

處世若大夢。胡爲勞其生。所以終日醉。頽然臥前楹。
覺來盼庭前。一鳥花間鳴。借問此何時。春風語流鶯。

感之欲嘆息。對酒還自傾。浩歌待明月。曲盡已忘情。
賦也。春風入懷。陶然自悅。

遊終南

孟郊

南山寒天地。日月石上生。高峰夜留景。深谷晝未明。
山中人自正。路險心亦平。長風驅松柏。聲拂萬壑清。
賦而比也。山有至理。人有常性。

詠聲

韋應物

萬物自生聽。太空但寂寥。還從靜中起。却向靜中銷。
賦也。言命理也。

詠風

王勃

蕭蕭涼風生，加我林壑清。驅煙尋磴戶，卷霧出山楹。
去來固無跡，動息如有情。日落山水靜，爲君起松聲。
比也。喻性體之動靜也。

山夜聞鐘

張說

夜臥聞夜鐘，夜靜山更響。霜風吹寒月，窸窣虛中上。
前聲旣春容，後聲復見盪。聽之如可見，尋之定無像。
信知本際空，徒挂生滅想。

比也。言命理之空虛，聲感無像。

雜詩

默念羣疑起。玄通百慮清。初心滅陽艷。復見湛虛明。
悟滅心非盡。求虛見後生。應將無住法。修到不成名。
賦也。無生滅想。命理禪機。渺然無畔。

聽江水聲

韋應物

鑿崖泄奔湍。稱古神禹跡。夜喧山門店。獨宿不安席。
水性自云靜。石中本無聲。如何兩相激。雷轉空山驚。
胎之道門舊。了此物我情。

比也。以水喻人。徹照源流。總歸定靜。

古松感興

皇甫松

皇天后土力、使我生此身。貴賤不我均、若爲天地情。
我家世道德、旨意匡文明。家集四百卷、獨立天地經。
寄言青松姿、豈羨朱槿榮。昭昭大化光、共此遺芳馨。
賦而比也。松貞槿幻。完命達天。

幽人

杜甫

孤雲亦羣遊。神物有所歸。靈鳳在赤霄。何當一來儀。
往與惠詢輩。中年滄洲期。天高無消息。弃我忽若遺。
內懼非道流。幽人在遐荒。洪濤隱語笑。鼓泄蓬萊池。

崔嵬扶桑日。照耀珊瑚枝。風帆倚翠蓋。暮把東皇衣。
懸漱元和津。所思煙霞微。知名未足稱。局促商山芝。
五湖復浩蕩。歲暮有餘悲。

興也。與理玄源。窮搜無際。託言靈境。

聽彈松入風

王昌齡

商風入我絃。夜竹淡有露。絃悲與林寂。清景不可度。
寥落幽居心。颺颺清松樹。松風吹草白。谿水寒日暮。
聲意去復還。九變待一顧。空山多雨雪。獨立君始悟。
賦而比也。琴風山雪。是真是幻。

卑靜

孟郊

卑靜身後老。高動物先摧。方圓木任器。剛勁木成灰。
大道晦羣物。達人腹衆才。時吟堯舜篇。心向無爲開。
彼隱山萬曲。我隱酒一杯。公庭何所有。日日清風來。
賦也知柔處。鎮守雌藏用。易道也。

雜詩

儲光義

坯渾本無象。末路多是非。達士志寥廓。所在能忘機。
耕鑿時未至。還山聊采薇。虎豹對我蹲。鸞鶴傍我飛。
僊人空中來。謂我勿復歸。格澤爲君駕。虹霓爲君衣。

西道崑崙墟。可與世人違。

賦也。知命則萬物備我。人神一體。

幽居

韋應物

貴賤雖異等。出門皆有營。獨無外物牽。遂此幽居情。
微雨夜來過。不知春草生。青山忽已曙。烏雀繞舍鳴。
時與道人偶。或隨樵者行。自當安蹇劣。誰謂薄世榮。
賦也。知命待時也。

步虛詞

吳真節

二氣搏萬有。化機無停輪。而我操其端。乃能出陶鈞。

寥寥大漠上，所遇皆清真。澄瑩含元和，氣同自相親。
絳樹結丹實，紫霞流碧津。以茲保童嬰，永用超形神。
賦也，命理無虧，形神自固，寓言也。

歸田園居

陶潛

野外罕人事，窮巷寡輪鞅。白日掩荆扉，虛室絕塵想。
時復墟曲中，披草共來往。相見無雜言，但道桑麻長。
桑麻日已長，我志日已廣。常恐霜霰至，零落同草莽。
賦而比也，恐脩不及時，性根萎謝。

種豆南山下，草盛豆苗稀。晨興理荒穢，帶月荷鋤歸。

道狹草木長。夕露霑我衣。衣露不足惜。但使願無違。
比也。達人知命。處亂世而不變其節。

飲酒

積善云有報。夷叔在西山。善惡若無據。何事空立言。
九十行帶索。饑寒況當年。不賴固窮節。百世誰當傳。
賦也。命有窮通。理無轍跡。守一不變。

結廬在人境。而無車馬喧。問君何能爾。心遠地自偏。
采菊東籬下。悠然見南山。山氣日夕佳。飛鳥相與還。
此間有真意。欲辯已忘言。

賦也。命中真樂得意忘言。

青松在東園。衆草沒奇姿。凝霜殄異類。卓然見高枝。
連林人不覺。獨樹衆乃奇。提壺撫寒柯。遠望時復爲。
吾生夢幻間。何事繼塵羈。

比也。君子處末世貴獨立也。

羲農去我久。舉世少復真。汲汲魯中叟。彌縫使其淳。
鳳鳥雖不至。禮樂暫得新。淶河輟微響。漂流逮狂秦。
詩書復何罪。一朝成灰塵。區區諸老翁。爲事誠殷勤。
如何絕世下。六籍無一親。終日馳車走。不見所問津。

若復不快飲。空負頭上巾。但恨多謬誤。君當恕醉人。
賦也。慨大道難傳。醉鄉獨契。

江上漁者

范仲淹

江上往來人。但愛鱸魚美。君看一葉舟。出沒風波裏。
比也。名利雖羶。性命易厄。

古意

傅汝礪

人言道路遠。直傍天涯去。頭上忽見天。近於江南路。
比也。喻天理也。

簪婦

張翥

昨日到城郭。歸來淚滿巾。遍身綺羅者。不是養蠶人。
比也。時不必逢。命有常數。不責報也。

開牖軒

蘇軾

啼鳩催天明。喧喧相詆譙。暗蛩泣夜永。唧唧自相吊。
飲風蟬至繁。長吟不改調。食土蚓無腸。亦自終夕叫。
鳶貪聲最鄙。鵲喜意可料。皆緣不平鳴。慟哭等嬉笑。
阮生已麤率。孫子亦未妙。道人開此軒。清坐默自照。
衝風振河海。不能號無賊。累盡吾何言。風來竹自嘯。
比也。人情不一。孤性湛然。

次韻定慧欽長老

左角看破楚，南柯聞長藤。鈎簾歸乳燕，穴紙出痴蠅。
爲鼠常留飯，憐蛾不點燈。崎嶇真可笑，我是小乘僧。
比也。慈悲命根，菩提覺路。

誰言窮巷士，乃竊造物權。所見皆我有，安居受其全。
戲作一篇書，千古發爭端。儒墨起相殺，予初本無言。
賦也。知命立言，天地皆歸。

閑居蓄百毒，教彼跛與盲。依山作陶穴，掩此異骨橫。
區區數一溉，豈能濟含生。力惡不已出，時哉非汝爭。

賦也。慨衆生之失所，竭一念之微慈。

客去室

客去室幽幽。鵬鳥來坐隅。引吭伸兩翅。太息意不舒。
吾生如寄耳。何者爲我廬。去此復何之。少安與汝居。
夜中聞長嘯。月露荒榛蕪。無問亦無答。吉凶兩何如。
賦而興也。知命達天。壽夭不貳。

出門

韓愈

長安百萬家。出門無所之。豈敢尚幽獨。與世實參差。
古人雖已歿。書上有其辭。開卷讀且想。千載若相期。

出門各有道。我道方未夷。且於此中息。天命不吾欺。
賦也希聖述言息機守命也。

集古知命卷終

集古樂天七

時運

榮木

齋心

來日大難

太虛真人

西城真人

題石室山

過野叟居

春日行天台

送賀知章

泛茅山東谿

田家即事

設罝

微塵

飯覆釜山僧

謁璿上人

牧童詞

采菱詞

樵父詞

漁父詞

終南別業

送友人歸山

聽說經

夢太白峰

終南幽居

仙山行

歲暮海上

遊茅山

華山歌

嵩山天門歌

集古樂天目終

集古樂天七

時運

陶潛

邁邁時運。穆穆良朝。襲我春服。薄言東郊。山滌餘靄。
宇曖微霄。有風自南。翼彼新苗。洋洋平津。乃澍乃漙。
邈邈遐景。載欣載嘯。稱心而言。人亦易足。擇茲一觴。
陶然自樂。延目中流。悠悠清沂。童冠齊業。閒詠以歸。
我愛其靜。寤寐交揮。但恨殊世。邈不可追。斯晨斯夕。
言息其廬。花藥分列。林竹翳如。清琴橫床。濁酒半壺。
黃唐莫逮。慨獨在予。

賦也。山水清暉，琴書靜娛，得者知之。

榮木

采采榮木，結根於茲。晨耀其華，夕已喪之。人生若寄，
憔悴有時。靜言孔念，中心悵而。采采榮木，於茲託根。
繁華朝起，慨暮不存。貞脆由人，禍福無門。匪道曷依，
匪善奚敦。嗟予小子，稟茲固陋。徂年旣流，業不增舊。
志彼弗舍，安此日富。我之懷矣，怛焉內疚。先師遺訓，
余豈云墜。四十無聞，斯不足畏。脂我名車，策我名驥。
千里雖遙，孰敢不至。

興也。樂以忘憂，不知老之將至矣。

齋心

王昌齡

女蘿覆石壁，谿水幽朦朧。紫萼蔓黃花，娟娟寒露中。
朝飲花下露，夜臥松下風。雲英化爲水，光彩與我同。
日月蕩精魄，寥寥天府空。

賦而比也。得道返虛，遊行無碍。

來日大難

李白

來日一身。携糧負薪。道長食盡。苦口焦唇。今日醉飽。
樂過千春。仙人相存。誘我遠學。海凌三山。陸憩五嶽。

乘龍天飛。目瞻兩角。授以神藥。金丹滿握。螭蛄蒙恩。
溪愧短促。思填東海。強銜一木。道重天地。軒師廣成。
蟬翼九五。以求長生。下士大笑。如蒼蠅聲。

比也。悟後真詮。託以立言。

太虛真人

觀神載形時。亦如車從馬。車敗馬奔亡。牽連一時假。
哀世但識此。但是惜風火。種罪天網上。受毒地獄下。
比也。就道說法。無上菩提。

西城真人

形爲渡神舟。泊岸當別去。形非神常宅。神非形常載。
徘徊生歎輪。但苦心猶豫。

比也。登岸渡筏。惻然不樂在徘徊也。

題石室山

秦系

白雲知所好。栢葉幸加餐。石鏡妻將照。仙書我借看。
鳥來翻藥枕。猿飲怕漁竿。借問巖前樹。何枝曾挂冠。
賦也。樂高隱也。

過野叟居

馬戴

野人閑種樹。樹老野人前。居止白雲內。漁樵滄海邊。

呼兒采山藥、放犢飲溪泉、自著養生論、無煩憂暮年、
賦也、樂養生無求於外也

春日行天台

貫休

重重太古色、濛濛花雨時、好峰行恐盡、流水語相隨、
黑壤生紅木、黃猿領白兒、因思石橋路、曾與道人期、
賦也得道之人胸中時有此境

送賀知章歸鑑湖

唐玄宗

遺榮期入道、辭老竟抽簪、豈不惜賢達、其如高尚心、
寰中得秘要、方外散胸襟、獨有青門餞、羣僚悵別陰、

賦也。樂蚤休也。

泛茅山東谿

儲光義

清晨登仙峰。峰遠行未極。江海霽初景。草木含新色。
而我任天和。此時聊動息。望鄉白雲裏。發棹清溪側。
松栢生溪山。無心自貞直。

賦也。山海娛性。靈木翳然。若見高溪。

田家即事

蒲葉日已長。苜蓿花日已滋。老農要看此。貴不違天時。
迎晨起飯牛。雙駕耕東菑。蚯蚓土中出。田鳥隨我飛。

羣合亂。啄噪。嗷嗷如道飢。我心多惻隱。顧此兩傷悲。
撥食與田鳥。日暮空筐歸。親戚更相誚。我心終不移。
比也。樂天自逸。動生憐憫。物我同仁。

設置

王維

設置守龜兔。垂釣伺遊鱗。此是安口腹。非關慕隱淪。
吾生好清淨。蔬食去情塵。今子方豪蕩。思爲鼎食人。
我家南山下。動息自遺身。入鳥不相亂。見獸皆相親。
雲霞成伴侶。虎豹侍衣巾。何事須夫子。邀子谷口真。
賦也。蔬食飲水。樂在其中。

微塵

一與微塵念。橫有朝露身。如是觀蔭界。何方置我人。
。有。固。爲。主。趣。空。寧。捨。賓。洗。心。詎。懸。解。悟。道。正。迷。津。
。因。愛。果。生。病。從。貪。始。覺。貧。色。聲。非。彼。妄。浮。幻。即。吾。真。
。四。達。竟。何。遣。萬。殊。安。可。塵。胡。生。但。高。枕。寂。莫。與。誰。憐。
。戰。勝。不。謀。食。理。齊。甘。負。薪。子。若。未。始。異。詎。論。疎。與。親。
。賦也謝彼微塵。甘子靜樂。

飯覆釜山僧

晚知清淨理。日與人羣疎。將候遠山僧。先期掃弊廬。

果從雲峰裏。顧我蓬蒿居。藉草飯松屑。焚香看道書。
然燈晝欲盡。鳴磬夜方初。一悟寂爲樂。此生閑有餘。
思歸何必深。身世猶空虛。

賦也。禪機道境。素心戒法。

謁璿上人

少年不足言。識道年已長。事往安可悔。餘生幸能養。
誓從斷臂血。不復嬰世網。浮名寄纓珮。空性無羈鞅。
臥承大導師。焚香此瞻仰。頽然居一室。覆載紛萬象。
高柳早鶯啼。長廊春雨響。床下阮家屐。窗前筇竹枝。

方將見身雲。陋彼示天壤。一心在法要。願以無生獎。
賦也。滅象界而脫微塵。可參靜諦。

牧童詞

儲光義

不言牧田遠。不道牧陂深。所念牛馴擾。不亂牧童心。
圓笠覆我首。長蓑披我襟。方將憂暑雨。亦以懼寒陰。
大牛穿層坂。小牛隱近林。同類相鼓舞。觸物成謳吟。
取樂須臾間。寧問聲與音。

比也。喻靜覺不爲物撓也。

采菱詞

濁水菱葉肥。清水菱葉鮮。義不游濁水。志士多苦言。
潮沒具區藪。潦浹雲夢田。朝隨北風去。暮逐南風旋。
浦口多漁家。相與邀我船。飯稻以終日。羹蓴將永年。
方冬水物窮。又欲休山樊。盡室相隨從。所貴無憂患。
比也。水有清濁。我無憂患。宛在中央。

樵父詞

山北饒朽木。山南多枯枝。枯枝作采薪。農室私自知。
詰朝礪斧尋。視暮行歌歸。先雪隱薜荔。迎暄臥茅茨。
清澗日濯足。喬林時曝衣。終年登險阻。不復憂安危。

蕩漾與神遊。莫知是與非。

比也。履險不厄。是樂天手段。

漁父詞

澤魚好鳴水。溪魚好上流。漁梁不得意。下渚潛垂鈎。
亂荇時礙楫。新蘆復隱舟。靜言念終始。安坐看沉浮。
素髮隨風揚。遠心與雲遊。逆浪還極浦。信潮下滄洲。
非爲徇行役。所樂在行休。

比也。樂在行休。意不在魚。何等冒次。

終南別業

王維

中歲頗好道、晚家南山陲、興來每獨往、勝事空自知。
行到水窮處、坐看雲起時、偶然值林叟、談笑無還期。
賦也、是喜怒哀樂未發景象、

送友人歸山歌

山寂寂兮無人、又蒼蒼兮多木、羣龍兮滿朝、君何爲
兮空谷、文寡和兮思淡、道難知兮行獨、悅石上兮流
泉、與松間兮草屋、入雲中兮養雞、上山頭兮抱犢、神
與棗兮如瓜、虎賣杏兮收穀、愧不才兮妨賢、嫌旣老
兮貪祿、誓解印兮相從、何詹尹兮可卜、

賦也。止堪自怡悅。不可持贈君。

聽說經

孟郊

古樹少枝葉。真僧亦相依。山木自曲直。道人無是非。
手持維摩偈。心向居士歸。空景忽開霽。雪花猶在衣。
洗然冰溪晝。寒物生光輝。

賦也。即境即真。無內外相。

夢太白峰

孟浩然

夢寐昇九垓。香靄達元君。遺我太白峰。寥寥辭步氣。
結宇在星漢。宴林閑氤氲。簷楹覆餘翠。巾舄生片雲。

時往谿水間。孤亭晝仍曛。松風引天影。石瀨清霞文。
恬日緩舟趣。霽心投鳥羣。春風又搖擺。潭島花紛紛。
比也胸中恍忽有此境界樂者參之

終南幽居

儲光羲

中歲尚微道。始知將谷神。抗策還南山。水木自相親。
淡林開一道。青嶂成四隣。平明去采薇。日入行刈薪。
雲歸萬壑暗。雪罷千巖春。始看玄鳥來。已見瑤華新。
寄言褰芳者。無乃後時人。

賦也。言達者行樂及早也。

仙山行

耿 萍

溪溪人不到、杖策獨緣源、花落尋無徑、雞鳴覺近村、
數翁皆積草、對奕復傾尊、看畢初爲局、歸逢幾世孫、
雲迷入洞處、水別出山門、惆悵歸城郭、樵柯迹尚存、
賦也樂天者、借境寓言也、亦真境也、

歲暮海上

孟浩然

仲尼既已沒、余亦浮於海、昏見斗柄回、方知歲星改、
虛舟任所適、垂釣非有待、爲問乘槎人、滄洲復何在、
賦也、虛舟自如、滄洲在是矣、

遊茅山

平生非作者。望古懷清芬。心以道爲際。行將時不羣。
茲山在人境。靈貺久傳聞。遠勢一峯出。近形千嶂分。
冬春有茂草。朝暮多鮮雲。此去亦何極。但言西日曛。
賦也。行道至此。漸入靈輿。水流花開。

昔賢居柱下。今我去人間。良以直心曠。兼之外視閒。
垂綸非釣國。好學異希顏。落日登高嶼。悠悠望遠山。
溪流碧水去。雲帶清陰還。想見中林士。巖扉長不關。
賦也。托跡靈境。自返元虛。

名嶽徵僊事。清都訪道書。出門入松栢。天路極空虚。
南極見朝采。西潭聞夜漁。遠心向雲宿。浪跡出林居。
爲已存實際。忘形同化初。此行良已矣。不樂復何如。
賦而比也。形忘性契。天人皆歸。

華山歌

劉禹錫

洪鑪作高山。元氣鼓其橐。俄然神功就。峻拔在寥廓。
靈跡露指爪。殺氣見稜角。凡木不敢生。神仙聿來託。
天資帝王宅。以我爲開鑰。能令下國人。不見換神骨。
高山固無限。如此方爲嶽。丈夫無特達。雖貴猶碌碌。

比也。喻性體也。見大造命我匪輕也。

嵩山天門歌

登天門兮坐盤石之磷磷。前縱縱兮未卜下漠漠兮
無垠。紛窈窕兮巖倚披以鵬翅。洞膠葛兮峰陵脣以
龍鱗。松移岫轉。左變而右易。風生雲起。出鬼而入神。
吾亦不知其靈怪如此。願遊杳冥兮見羽人。重曰天
門兮窅崇。迴合兮攢叢。松萬接兮挂日。石千尋兮倚
空。晚陰兮足風。夕陽兮施紅。試一望兮奪鯢。汎衆妙
之無窮。

此也、天門自我開闢、達者從此托足、